

WANTOK

NIUSPEPA BILONG YUMI OL PAPUA NIUGINI STRETI 27 YIA NAU

24 pes

Namba 1,279

Wik i stat long Fonde Desemba 31, 1998

60t

INSAIT

• Aigilo askim ol plis long mekim gut wok. - pes 2

• Lukim nem bilong ol fri kalabus lain. - pes 3

• Hevi bilong Is Sepik baset. - pes 5

• Ol Hailans nius. - pes 7

Noken senisim Wakon na Wagambie, Plis asosiesen i tok

YAKAM KELO i raitim

PLIS Asosiesen i no amamas tru long Plis Minista Thomas Pelika i laik senisim ol sinia plis opisa olsem tupela deputi komisina, sampela asisten komisina, ol provinsel komanda na arapela sinia opisa insait long Papua Niugini.

Presiden bilong PNG Plis Asosiesen Aloysius Eviassa i tok strong olsem ol i gat ripot olsem gavman i laik senisim NCD plis komanda John Wakon i go long Lae na Metropolitan Supritenden Tony Wagambie bilong Lae i go long Mosbi.

Mista Eviassa i tok Mista Wakon na Mista Wagambie wantaim i mekim gutpela wok long Lae na Mosbi na i no gat gutpela as tru long plis Minista i laik senisim tupela long gutpela wok tupela i mekim nau.

Mista Eviassa i askim Minista Thomas Pelika long tokaut klia long wanem samting tru i asua long wok bilong John Wakon long NCD. Wanem lo bilong plis em Mista Wakon i brukim na ol i laik senisim em.

Em i askim tu Mista Pelika long tokaut klia long wanem gutpela as tru bilong mekim ol dispela senis long ol sinia plisman bilong kantri.

Plis Asosiesen i mekim dispela toktok bihain long wanpela ripot bilong Plis na CIS Minista Thomas Pelika i tok long senisim ol sinia plis opisa na larim Plis Komisina Peter Aigilo i stap yet long wok bilong em.

Presiden bilong asosiesen Eviassa i tok ol i klia olsem John Wakon na Tony Wagambie i wok long redim ol samting bilong tupela long senisim wok.

Asosiesen presiden i tok ol i save pinis long dispela samting na Minista Pelika bai tokaut long dispela senis liklik taim. Tasol ol i tingim gutpela wok bilong ol plisman long sevim kantri na ol i laik egensim dispela senis Mista Pelika bai kamapim.

Ol i askim Mista Pelika long i no ken pusim ol politikel tingting na wok bilong politiks i kam insait long bagarapim gutpela wok bilong plis fos insait long kantri.

John Wakon i bin wok olsem NCD plis komanda inap 6-pela mun tasol long dispela yia. Em i bin mekim planti bikipela wok we i kamapim kot bilong Westen Hailans Gavana Pater Robert Lak long toktok bilong pamuk vidio teip, sasim Difens Komanda Jerry Singirok long wok bilong em insait long hevi bilong Sandlain las yia na bihainim gen planti bikipela trabel na birua we i bin kamap bipo na arapela moa.

Opis bilong Plis Komisina Peter Aigilo i nogat bekim long em taim Wantok i laik kism bekim bilong Mista Aigilo long dispela toktok.



• NCD plis komanda John Wakon i toktok long ol manmeri long taim ol i laik soim bel kros bilong ol long dispela yia long Waigani kot haus.

Gavman putim K60 milien long skul fi subsidi

WENCESLAUS MAGUN i raitim

NESENEL Gavman i putim K60 milien long 1999 skul fi subsidi. Long dispela mani, Dipatmen bilong Edukesen bai lukautim K40 milien na wan wan Provinsel Gavman bai lukautim K20 milien, Minista bilong Edukesen, Muki Taranupi i tok.

Mista Taranupi bai givim namba wan kwata bilong dispela mani (K17.3 milien) long Januari 27 long wan wan provins insait long wanpela miting long Rabaul na namba tri kwata bilong dispela mani (K17.3 milien) long Julai 19.

Mista Taranupi i tok astingting bilong Nesanel Gavman long putim skul fi subsidi em bikos Gavman i laik helpim samting olsem 85 pesen bilong ol papamama i stap long ples insait long Papua Niugini long baim hap bilong tuisen fi (mani bilong ol skul meteriel, ol samting bilong tuisim ol skul pikinini, ol skul yunifom, samting bilong pilai) na ol kain samting olsem.

Em i tok astingting bilong Nesanel Gavman long givim K20 milien long wan wan Provinsel Gavman em bilong ol Provinsel Gavman i ken go het long baim ol 'bod' na 'lodjing fi', skul infrastraksa, mentenens na developmen kos. Na ol papamama i mas baim 'skul fi' na 'projek fi'.

Long daunim hevi bilong ol papamama long brukim poket bilong ol long painim mani na baim 'skul fi' na 'projek fi', Mista Taranupi i askim wan wan Provinsel Gavman long katim sampela mani insait long 1999 Provinsel Baset bilong ol na putim sampela mani i go insait long helpim ol papamama wantaim 'skul fi' na 'projek fi'.

Em i tok wan wan skul insait long kantri yet bai makim amas 'skul fi' na 'projek fi' ol papamama i mas baim. Nau yet opis bilong Nesanel Edukesen i no redim dispela ripot.

Mista Taranupi i tok, dispela tingting bilong skelim wok bai Nesanel Gavman i putim hap mani, wan wan Provinsel Gavman i putim hap mani na ol papamama i putim hap mani bilong baim skul fi subsidi bilong ol skul pikinini i bin kamap long Desemba 7, 1997 bihain long wanpela wok painim i soim olsem Nesanel Gavman i no inap long baim olgeta skul subsidi aninit long tingting bilong 'Fri Edukesen'. Dispela wok painim i soim olsem sapos Nesanel Gavman i laik givim 'Fri Edukesen,' Nesanel Gavman bai yusim moa long K155 milien long baim skul fi subsidi. Na dispela kain mani, Nesanel Gavman i nogat.

Mista Taranupi i tok Nesanel Gavman i givim namba wan prairiti long Besik Edukesen. I gat tripela level bilong dispela. Stat long prep i go long gred tu em ol i kolim Elementeri. Stat long gred tri i go long gred faiv em ol i kolim lowa praireri na stat long gred siks i go long gred eit em ol i kolim apa praireri. Long dispela as Nesanel Gavman i putim K18.8 milien bilong dispela K40 milien i go insait long Besik Edukesen na i no long ol level i antap long dispela.

Mista Taranupi i tok ol papamama bilong ol pikinini i go long Sekenderi Skul, Nesanel Hai Skul na ol Vokesenel Skul i mas digim poket bilong ol long baim skul fi bilong pikinini bilong ol, bikos kos bilong skul fi long ol dispela level bilong skul i antap. Long helpim ol papamama, pikinini bilong ol i go long ol dispela skul, Nesanel Gavman i putim moa long K12.2 milien bilong tuisen fi.

Gavman bai rausim moa kalabus lain

PETER MAIME i raitim

DISPELA komiti Praim Minista, Bill Skate i kamapim long lukluk na skelim oi lain husat bai oi i lusim long ol haus kalabus, i bung gen tude long stretim nem bilong ol nupela lain gavman bai rausim long nu yia.

Siaman bilong dispela komiti na Atoni Jenerel, Michael Gene i tok asde olsem komiti bilong em bai bung tude long toktok long husat kalabus lain bai kam aut long nu yia. Gavman i bin rausim pinis 115 kalabus man, meri na ol yangpela mangi long las wik long krismas de. Opis bilong Komisina bilong Koreksenol Sevis (woda) asde i tok olsem olgeta dispela lain gavman i tok orait long ol i rausim long kalabus, em olgeta i go aut pinis.

Mista Gene i tok gen olsem komiti bilong em bai lukluk gut na rausim ol lain ol i sik, ol lapun na ol lain i gat gutpela rekot long kalabus na i no inap long givim trabel gen long komyniti. Em i tok, ol lain komiti bilong em i ting bai kamapim birua autsait long banis kalabus, bai oi i no inap lusim. Taim Wantok i askim Mista Gene hamas kalabus lain bai gavman i rausim ol long nu yia, em i tok, em i no save yet. Tasol em i tok, komiti bilong em bai gen lukluk long olgeta haus kalabus long PNG na i no long Bomana tasol olsem sampela lain i ting.

Ol memba ol i stap long dispela komiti em wanpela opisa i makim dipatmen bilong Praim Minista, Koreksenol Sevis Komisina o wanpela man o meri em i makim, Plis Komisina em yet o wanpela opisa em i makim, Sief Probesen Opisa, Nesenel Inteligin

Ol kalabus lain husat gavman i rausim ol long krismas long las wik

Baisu Joseph Koima Mali James Eperam Gelenda Yet Mek Kondi Bau Samuel Awa Lawerence Bepi Helen Ambil Timothy Kua Roselyn Paul Demane Ulka Simon Rami David Binis Peter Gibson Minabe Kaiyu Nege Minakaso Yomba Mugago Paul Huk Miugle Bau	Bihute Christopher Degim Mai Gorape Oka Omba Ami Yansowo Rex Morofa Bomana Vele Vaira John Kaida John Paul Tapona Sakun James Kora Ku'u Mailahu John Timo Cornelius Jessica Mora John Peter John Maima Boram Peter Aring Jack Bali Roger Pongo Narun Kenneth Wanwangi Rodney Nopra Edward Aigo Thomas Kumbi Paul Yafai	Michael Warike John Huanjo Lazarus Wararu Buimo John Valimo Anonga Scopion Francis Daffa Jeffery Lapan Steven Maia Gilbert Ipmawara Dickson Opale Jacob Papa Daniel Steven Gaindu Leo Kevin Gambu Alundi Watu Ben Omasi Gisoa Adanga Vennon John Francis Aimis Timothy Tom Wanpis Seibi Lemekoi Koikoi James Angu Enos Sael Samuel Ronald	Mana Lista Dala Mange Yama John Rudolf Sarak Augustine Wapak Joseph Tai Kingsley James Junali Tinga Dope Matti Toa Peter Martha Laviong Monica Lonson Lina Miama Margret Gubab Bundaira Kinime Anni Robert Vera Boiboi Spencer Wayaki Tombu Api Nimi Norman Manayapu Allen Puraso Kem Gomora Daki James Nelson Gairi Ken Usupa	Kavieng Austin Sapias Luanda Stanly Epel Lungas Barry Steven Keberat John Tenaikanai John Fabian Dong Namaliu Addy Wala Steven Tamean Peter Dyujo Kepas Konge Clement Malisa Erick Ada Chris Lakiemata Robin Muiya Steven Philip Thomas Yoti Darius Kimale David Pamundi Manus Pali Pohuton
---	--	---	--	--

Ogenaisesen (NIO), Parol Bod Siaman na wanpela husat i makim ol sios. Mista Gene i tok bikpela tingting bilong gavman em long bungim olgeta lain i save go pas long sasim ol kalabus manmeri, long ol lain i save wok long kot na long kalabus. Em i ting dispela we bai i givim komiti bilong em long mekim gutpela

disisen long husat bai i kam aut long kalabus. Praim Minista Skate long las wik i tok, ol lain i go kalabus long kilim ol man i dai, bagarapim ol meri na ol bikpela trabel bai i no inap kam aut long kalabus. Em i tok, husat lain bai givim hevi long ol pipel gen bai stap yet long kalabus. Tasol taim nem bilong ol lain gavman

bai rausim ol long kalabus i kam ples kliia, em i no soim wanem kain trabel wan wan i mekim na go long kalabus. "Mi laik tokim ol pipel bilong PNG olsem ol lain mipela i rausim ol long laisens em ol lain husat bai stap gut na i no givim pen na hevi gen long ol pipel," Skate i tok.

Lo bilong kontrolim sekyuriti kampani kamap klostu

PLIS Fos bilong Papua Niugini wantaim Sekyuriti Gad Asosiesen bilong Papua Niugini i bin raitim wanpela nupela lo bilong kontrolim ol wok bilong ol sekyuriti long PNG. Dispela nupela lo em plis dipatmen i bin salim i go pinis long Seketeri bilong Dipatmen bilong Praim Minista, Robert Igara, husat tu i siaman bilong Nesenel Developmen Advaisri na Implementesen Komiti. Sapos dispela komiti i lukluk na tok orait long dispela lo, bai oi i salim i go long Nesenel Eksekutiv Kaunsel long paitim ol toktok long en. Sapos Nesenel Eksekutiv i tok orait, gavman bai kisim i go long palamen long mekim dispela nupela lo olsem wanpela lo insait long PNG bilong kontrolim ol wok bilong ol sekyuriti kampani.

Dispela nupela lo i laik was long ol sekyuriti kampani long tripela rot. Namba wan em long ol kampani husat i save saplain ol man o meri

long wok sekyuriti i mas gat laisens, namba tu em husat man o meri i laik wok sekyuriti i mas gat permit long wok na las long en, em long kamapim wanpela bodi o komiti we i ken glasim na kontrolim ol wok bilong ol sekyuriti kampani na bilong givim ol laisens.

Ol narapela gavman dipatmen olsem Atoni Jenerel o lo opis bilong gavman, Treseri na Kopret Afeas, Nesenel Plening na Implementesen, Provinsel na Lokel Gavman Afeas, Opis bilong Famili na Sios Afeas na Koreksenol Sevis (Woda) i bin rait i go long plis depatmen na givim sapot long dispela nupela lo. Pas bilong ol dispela dipatmen, plis i bungim wantaim dispela nupela lo na Ekting Plis Komisina Robert Korus i salim i go pinis long Mista Igara long Oktoba 5, 1998. Opis bilong Plis Komisina i tok olsem Nesenel Eksekutiv Kaunsel i no yet sindaun na lukluk

long dispela nupela lo.

Plis dipatmen i tok, nau long dispela taim i nogat wanpela lo i stap na was long ol sekyuriti kampani na tokim ol long wanem samting ol i ken mekim na ol samting ol i no inap long mekim. Em i tok, sekyuriti industri long PNG i wok long groa bikpela na planti manmeri i wok long en na plis i ting i mas i gat lo long lukautim dispela kain industri. Plis tu i tok, sampela ol sekyuriti i no save givim gutpela sevis na dispela i save kamap ples kliia taim ol i save kisim ol lapun wok manmeri na sampela lain pasin bilong ol i krangki.

Long las wik, Nesenel Kapitel na Sentrel Plis Komanda, Sief Suprintenden John Wakon, i autim belhat bilong em long ol sekyuriti kampani long i no trenim ol wok manmeri bilong ol. Em i bin mekim ol dispela toktok taim opis bilong em i bin kisim ol ripot olsem sam-

pela ol sekyuriti gad i paitim na kilim tupela man insait long Mosbi siti.

Suprintenden Wakon i tok, aninit long lo bilong kantri, plis na ol sekyuriti gad i nogat wanpela rait long paitim na killim indai ol manmeri. Em i tok, wok bilong ol em long stapim ol trabel lain long ol i no ken kamapim ol birua pasin long ol narapela lain. Em i tok planti taim, ol sekyuriti gad i save paitim ol trabel man bipo long ol i givim i go long han bilong plis. Suprintenden Wakon i tok, dispela kain pasin i no stret na em i bin askim ol sekyuriti kampani long stretim hariap dispela kain hambak pasin long ol wok manmeri bilong ol.

Wantok i bin toktok wantaim Atoni Jenerel o bos bilong ol loya bilong gavman, Michael Gene long asde long kisim sampela tingting long sait bilong lo long ol wok bilong ol sekyuriti kampani. Mista Gene i tok, ol sekyuriti gad i no gat wanpela

pawa long sasim, kalabusim, paitim o pinisim laip bilong ol narapela lain. Em i tok ol sekyuriti wok manmeri mas kisim gutpela trening na save long wok wantaim ol pipel. Em i tok, ol sekyuriti gad mas "save long we bilong yusim ol kopi stik bilong ol na i no long paitim ol man nating." Mista Gene i tok tu olsem, ol dok bilong ol sekyuriti kampani i mas gat laisens. Sapos nogat na wanpela dok bilong wanpela sekyuriti kampani i kaikaim wanpela man, meri o pikinini, ol i ken kotim papa bilong dok. Sapos ol dok i gat laisens, dispela i no min olsem ol sekyuriti gad i ken lusim rop bilong dok, na dok i ken mekim save long laik. Mista Gene i tok, wan kain samting tu i go long ol sekyuriti kampani i gat gan. Em i tok, ol dispela kampani mas save long stretpela rot bilong yusim gan bilong ol. Em i laik bai plis dipatmen tu i mas mekim wok bilong ol long painim aut na rekotim long buk hamas gan ol kainkain sekyuriti kampani i gat long PNG.

TOTO



WANTOK

NIUSPEPA BILONG OL PAPUA NIUGINI

Kamapim gutpela nu yia

Planti hap bilong Papua Niugini i bin amamasim gutpela krismas wiken long las wik. I bin nogat trabel na ol bikhet pasin. Dispela em i wanpela bikpela senis insait long kantri long ol arapela krismas bipo we i save gat ol trabel na sampela bikhet pasin i kamap.

Bikpela tok amamas i go long ol plisman long wanwan provins na taun long mekim gutpela wok long kamapim isi krismas wiken long hap bilong ol. Tok amamas tu i go long olgeta pipel bilong wanwan provins long bihainim lo na sindaun gut wantaim famili bilong ol na amamasim gutpela krismas long banis, haus lotu na ples bung bilong ol.

Dispela em i wanpela gutpela mak we i soim olsem ol manmeri i laik amamasim gut krismas wantaim famili bilong ol. Olsem na dispela pasin i mas stap yet long dispela wiken taim yumi laik welkamim nupela yia 1999.

Yumi olgeta i mas sindaun gut na mekim gutpela bung bilong yumi long amamasim dispela nu yia wiken long Fraide na Sarere. Gutpela pasin yumi wanwan i mekim, bai yumi olgeta i amamas gut wantaim.

Long tingim dispela yia 1998, Wantok Niuspepa i laik salim bikpela tok amamas bilong em i go long olgeta rida bilong em long dispela yia. Ol wokmanmeri bilong Wantok Niuspepa i laik tok gutpela hepi nu yia long yupela olgeta rida bilong em insait long Papua Niugini na amamas long bungim yupela gen long neks yia. Neks yia bai yumi olgeta i bung gen na amamas long sapot wantaim na strongim wanpis tok pisin niuspepa bilong yumi i go het insait long yia 2000 na i go.

Gutpela na Bikpela God Papa bilong yumi olgeta bai blesim yumi na lukautim yumi olgeta gut inap yumi bung gen long bungim nupela yia 1999.

Bogenvil i kam aninit long rekonsiliesen gavman

BARBARA MASIKE i raitim

BOGENVIL nau i stap aninit long Bogenvil Rekonsiliesen Gavman (BRG) bihain long ol lida i bung long Arawa i pasim konstitusen long Fonde Desemba 24.

Dispela i min olsem Joseph Kabui na Primia Gerard Sinato nau bai stap olsem ol lida bilong konstituent asembli. Asembli bai i gat ol arapela mausman bilong ol arapela hap wantaim tu ol 4-pela memba bilong Bogenvil.

Dispela bai i stap wok i nap long BRG i kamap strong wantaim wanpela ileksen long mun Mas o Epril long 1999.

Ol grup i stap insait long dispela gavman em long ol BTG, ol rebel, ol risistens pos, ol sios grup na ol meri husat ol lida bilong ol i bin stap long saining bilong kamapim dispela konstitusen.

Ol ripot i kam long Bogenvil i tok Francis Ona tu i sapotim dispela konstitusen we i kisim 4-pela de long toktok namel long ol lida husat i sindaun long dispela miting.

Samting olsem 200 deliget olgeta i kamap long miting ya. Dispela asembli bai stat wok long taim BTG i pinis long Desemba 31.

Ol arapela memba bilong asembli em long Mista Ona na 3-pela memba bilong grup bilong em, ol 4-pela MP bilong Bogenvil, olgeta BTG memba, olgeta memba bilong BIG, 10-pela rebel komanda na ol opisel bilong ol, 10-pela risistens pos komanda na opisel, 6-pela wimens mausman, 3-pela sios mausman na 3-pela bai kam long ol sios i stap insait long Bogenvil.

Mista Ona i sapotim dispela taim em i salim tupela opisa bilong em i kam long miting na em i askim tu sapos em i ken gat sampela sit insait long asembli.

Asembli bai stat wok olsem trensisinel gavman pastaim insait long tupela o 3-pela mun i nap long taim bilong ileksen long muh Mas o Epril.

Long dispela taim bai asembli i makim wanpela president na tupela namba tu presiden. Mausman bilong ol BRA/BIG

Andrew Miriki i tok olgeta memba bilong konstituen asembli bai lusim ol posisen bilong ol long stap insait long BRG ilekson aninit long ol konstituen bilong ol.

Mista Miriki i tok olgeta Bogenvil lida bai holim ol miting wantaim nesanel gavman long BRG konsitusen taim ol BTG rebel teknikel opisa i stretim ol wok bilong de bilong namba wan miting bilong konstituen asembli.

"Bai mipela i mekim wanpela kopi bilong konstitusen i kamap long gavman olsem konsaltiesen proses," Mista Miriki i tok.

Em i tok ol pipel bilong Bogenvil i laikim olsem i mas gat bilip i mas kam long nesanel gavman."

"Olgeta samting mipela i mekim i stap insait long Lincoln agrimen, ol samting mipela i mekim i kamap i stap pinis long hap." Mista Miriki i tok.

Opis bilong praim minista i tok Bill Skate i harim pinis na bai sindaun na mekim sampela bekim toktok klostu taim bihain long em i kisim toktok long Atoni Jenerel.

50 toea long Kavieng PMV sevis

OL lain pasindia i save ron long PMV long Kavieng bai baim PMV nau long 50 toea long ron bilong ol insait long provins. Ol bikpela manmeri bai baim 50 toea nau olsem bas fea long Kavieng taun.

Nu Ailan PMV Onas Asosiesen i bin askim long apim fi bilong PMV long 20 toea i go antap long 60 oea. Tasol Nesanel Land Transport Board i bin wanbel long ol i ken daunim i go daun liklik long 50 toea. Dispela em long mekim PMV fea bilong Nu Ailan provins i go antap wankain olsem ol arapela taun na siti insait long kantri.

Ol taun bas fea long ol arapela siti na taun long 1994 i bin 40 toea na 50 toea tasol Kavieng taun i bin stap 20 toea inap dispela taim nau ol i askim long mekim senis.

Ripot i kam long Kavieng taun i tok ol papa bilong bas na PMV i tok ol i wok long bungim hevi wantaim dispela liklik fea bilong PMV. Olsem na ol i laikim PMV fea i mas go antap liklik.

Narokobi askim Skate long singautim palamen

OPOSISEN lida Bernard Narokobi i singaut long Praim Minista Bill Skate long singautim palamen long sindaun na toktok long ol samting em ol Bogenvil lida i mekim long kamapim Bogenvil Rekonsiliesen Gavman (BRG).

Mista Narokobi i tok i gat bikpela nid long palamen i mas sindaun na pasim sampela lo we bai mekim ol samting ol BRA na BIG lida i mekim i stap insait long lo.

Mista Narokobi i tok aninit long Ogenik lo nesanel eksekutiv kaunsel i ken toksave long gavana jenerel long singautim palamen.

"Mi singautim strong long Praim Minista long singautim palamen long bung hariap, samting olsem long mun Jenueri," Mista Narokobi i tok.

Mista Narokobi i tok ol wanem kain rot long kirapim rekonsiliesen gavman long Bogenvil i mas gat lo long sapot i kam long nesanel

gavman na sapos dispela i no kamap dispela bai bagarapim ol han lo nau i stap pinis, em i tok.

Em i tok wanem gavman i stap long ailan i mas stap na wok aninit long lo na luksave bilong bikpela mama lo.

Em i tok olsem Oposisen i save tok oltaim olsem i gat wanpela rot tasol long pinisim dispela trabel long Bogenvil na em long oposisen na gavman bung wantaim.

"Mi laik tok olsem tu long Praim Minista nogut em i bungim birua sapos em i rausim olgeta proposel i kamap long Bogenvil.

"Praim Minista i noken tingting tasol long em yet, em i mas tingting tu long Bogenvil na Papua Niugini," Mista Narokobi i tok.

Em i tok sapos palamen i no bung i nap long mun Julai em bai nogat rot long stretim ol samting i kamap long Bogenvil.

WANTOK

NIUSPEPA BILONG YUMI OL PNG STRET

P. O. Box 1982, Boroko
 Telepon namba: 325 2500
 Feks namba: 325 2579

PE BILONG WANPELA VIA 52 NIUSPEPA

PLES	AIR
Arapela PNG eria	K 52
Ostrelia na Nu Silan	K84 (\$US46)
Esia Pasifik na Japan	K99 (\$US55)
Amerika na Yurop	K172 (\$US95)

Biabia



BAGA WOK LONG CIVIM BIA LONG OL MANMERI NA SEM TAIM EM TU APIM I STAP...



Bogenvil Rekonsiliesen Gavman bai go long kebinet tude

KEBINET bai lukluk long ol han lo bilong Bogenvil Rekonsiliesen Gavman (BRG) taim em i holim las miting bilong em long tude.

Minista bilong Bogenvil Afeas Sam Akoitai dispela wik i tokaut olsem dispela hap lo em i kamap long amamasim ol pipel bilong Bogenvil tasol i mas stap insait long ol lo bilong Papua Niugini yet.

Minista AKoitai i tok aninit long Lincoln Agrimen BRG bai kamap long helpim pasin bilong painim gutpela sindaun long Bogenvil.

"Ol proposel mi bai kisim i go long kebinet bai strongim bel isi i kamap pinis namel long olgeta pati i stap insait long dispela rot bilong painim bel isi," Mista AKoitai i tok.

Mista Akoitai i tok i no long taim olgeta 4-pela memba bilong Bogenvil i bung wantaim na pasim tok olsem BRG bai stap ausait long provinsel gavman rifom. "Taim mi tok sore olsem ol amenmen long nesanel konstitusen na ogenik lo i

no nap kamap lo, mi gat bilip olsem yumi ken go het yet.

BRG i ken stap aninit long ol lo bilong Papua Niugini na ausait long provinsel gavman rifom. Na sabmisen we kebinet bai lukluk long em i gat dispela we long soim hau dispela BRG bai wok," Mista Akoitai i tok.

Minista i tok yumi noken kirap nogut sapos BRG bai kamapim planti toktok. BRG em i makim wanpela bikpela poin tru we taim yumi kamap long hia, yumi no i nap long go bek gen. "Em bai strongim yumi long gat tras na sekyuriti long graun, na mi askim long olgeta Bogenvil lida long sanap strong stat long taim yumi stap long Burnham i kam long Lincoln i kam i nap long taim yumi kamapim BRG," Mista Akoitai i tok.

Em i tok olgeta han lo bilong BRG bai kamap long ples klia taim olgeta toktok i pinis long dispela wik.

Is Sepik Provinsel Gavman i sot long mani bilong mekim wok long 1999

WENCESLAUS MAGUN i raitim

WANPELA ripot i kam long opis bilong Sir Michael Somare i soim olsem long 1998, Nesenel Gavman i sapos long givim Is Sepik Provinsel Gavman, K39,21,400. Tasol i kam inap tude, Is Sepik Provinsel Gavman i no kisim yet olgeta dispela mani.

Ripot i tok Is Sepik Provinsel Gavman i no kisim yet mani bilong tas kwata bilong 1998 Baset. Antap long dispela hevi, Nesenel Gavman i givim Is Sepik Provinsel Gavman K37,416,800 bilong 1999 Baset. Ripot i tok pasin Nesenel Gavman i mekim bilong katim 1999 Is Sepik Provinsel Baset bai givim moa hevi long Is Sepik.

Rausim mani bilong 1999 Is Sepik Provinsel Baset. Dispela bai kamapin wanem kain hevi.

- Ripot i tok:
- Nesenel Gavman i katim mani bilong ol Lokol Level Gavman long K5.5 milien i go daun long K0.7 milien. Wan wan LLG bai kisim K27,000. Dispela i soim olsem nogat wanpela LLG inap mekim olgeta wok ol i sapos long mekim;
- Nesenel Gavman i katim K2 milien insait long Infrastraksa Developmen. "Dispela em i no inap long mipela i ken mekim planti ol wok insait long Infrastraksa Developmen Progam bilong 1999." Ripot i tok. Long 1999 Nesenel Gavman i katim mani bilong Nesenel Dipatmen bilong Woks na i skelim sampela rot mentenens wok i go long wan wan provins. Long Is Sepik Provins dispela disisen Nesenel Gavman i mekim, bai stopim Is Sepik Provinsel Edministresen long i no inap stretim planti ol rot na arapela infrastraksa sevis i stap pinis long provins;
- Nesenel Gavman i katim mani bilong baim ol gavman wokman long 14 pesen. "Dispela i min olsem Edministresen i mas rausim sampela pablik sevens o tokim ol long ritrens. Tasol ripot i tok Nesenel Gavman i no putim mani bilong mekim dispela wok. Olsem na sapos Edministresen i laik pinisim ol pablik sevens long provins, Is Sepik Provinsel Gavman i mas painim mani bilong em yet long mekim dispela wok." Ripot i tok

wantaim Baset kat bilong 1999 dispela bai i no inap kamap;

- Ol arapela eria we Nesenel Gavman i no rausim mani long ol em long helt na edukesen. Tasol dispela em ol tait na kondisinel grant long sait bilong Sios Helt Sevis na pe bilong ol tisa;
- Nesenel Gavman i katim bikipela mani tru insait long Edukesen Sabadi long K1.8 milien i go daun long K0.8 milien. "Dispela kat bai fosim Provinsel Edministresen long digim paus bilong provins. Mipela i no inap mekim dispela bikos, i no gat inap mani bilong mekim";
- Is Sepik Provins i nogat bikipela reveniu bes na olsem em i no inap long yusim mani bilong em yet long stretim ol dispela hevi;

Rausim mani insait long Lokol Level Gavman Fanding

- Ripot i go het na tok:
- Nesenel Gavman i rausim mani bilong lukautim Wewak taun, Angoram, Maprik na Ambunti long K530,000 i go daun long K240,000. "Dispela bai mekim hat long givim ol sevis na stretim ol sevis i bagarap insait long ol distrik het kwata na taun";
- Nesenel Gavman i katim bikipela mani tru long Lokol Level Gavman long K5.5 milien i go daun long K700,000. "Dispela bai mekim ol LLG i no inap mekim wok. K27,000 bilong wan wan LLG bai i no inap karim aut ol projek na ol arapela program i stap long plen bilong developim ol ples aninit long botom ap plen. (Ating Rurel Development Opis bai helpim long mekim ol dispela wok);"
- Nesenel Gavman i skelim moa wok i go long provins tasol i no givim mani olsem:**
- Provinsel Gavman nau bai baim ol wokman bilong Provinsel Treseri;
- Provinsel Gavman nau bai baim ol wokman bilong Paia Sevis. "Mipela i laik save sapos Nesenel Gavman bai salim ol wokman na ol samting bilong wok bilong Paia Sevis i kam long provins";
- Provinsel Gavman bai sapatim wok bilong lukautim ol haus kalabus insait long rijen wantaim 50 pesen;
- Provinsel Gavman bai putim 25 pesen bilong kos bilong lukautim plis fos insait long provins;
- Provinsel Gavman nau i mas

lukautim Dipatmen bilong Agrikalsa na Laivstok wantaim ol ekstensen sevis bilong en;

- Provinsel Gavman i nau bai lukautim ol Nesenel Brodkasting Sevis long provins na i mas kisim 20 wokmanmeri tasol long wok;
 - Provinsel Gavman nau i mas lukautim ol viles kot na i no moa Dipatmen bilong Atoni Jenerel.
- Ripot i tok:
- Nesenel Gavman i no bin sindaun na toktok wantaim Is Sepik Provinsel Edministresen bipo long ol i skelim ol dispela wok i go long provins. I nogat ripot i tokaut olsem husat i boim ol dispela wokmanmeri. Provinsel Gavman bai kisim mani long wanem hap long fandim ol. Na wa em ol eria bai Nesenel na Provinsel Gavman wantaim i fandim;
 - Is Sepik Provinsel Edministresen i gat mak bilong baim olgeta wokmanmeri insait long provins wantaim K5.5 milien. Tasol insait long 1999 Baset, Nesenel Gavman i givim ol K4.8 milien. Dispela i no inap long baim ol arapela wokmanmeri Nesenel Gavman i salim i go long provins.


Ripot i singaut strong i go long Nesenel Gavman long putim mani bilong lukautim ol wok na ol wokmanmeri nau Nesenel Gavman i salim i go long Is Sepik Provinsel Gavman long lukautim.

Ripot i askim Nesenel Gavman long givim dispela K1.5 milien ol lida i pasim tok long kisim insait long Rurel Eksen Progam bilong ol, i go stret long opis bilong Joint Distrik Plening na Baset Praioriti Komiti. Na i no mas gat wanpela kondisen long dispela mani. Ating dispela bai helpim Provinsel Edministresen long yusim sampela mani insait long dispela fan bilong mekim ol arapela wok provins i sot long mani long mekim.

Ripot i tok maski Nesenel Gavman i hapim mani insait long Is Sepik Provinsel Edministresen long K2.6 milien i go antap long K2.8 milien, dispela i no inap long mekim ol wok insait long provinsel hetkwata. Wantaim 25 pesen kos bilong plis wok tasol bai kosim provinsel edministresen hap milien kina. Na dispela i no kaunim kos bilong lukautim Koreksenel Sevis, Paia Sevis na Nesenel Brodkasting Koporesen.

Aitape niu wantaim **WENCESLAUS MAGUN**

Rot wok i stop bikos mani i sot



ol pipel bilong arapela kantri long salim moa mani i go long dispela akaun, bai ol i ken yusim dispela mani long pinisim wok bilong rot.

Ripot i kam long Aitape Daiosis Rihabilitesen Komiti i tok, 50 pesen bilong rot i go long Malol ples i pinis. Ol arapela i no pinis yet. I gat moa wok i stap bilong putim karanas, mekim ol bris, na digim baret.

Wok bilong rot i go long Arop wan ples i pinis. Rot i go long Arop tu ples i no pinis yet. Ol i no putim karanas, i no wokim bris na i no digim baret long rot i go long Barupu ples. Rot i go long nupela Sissano ples na ol arapela sevis we ol i tingting long putim long Olbrum em tu i no stat yet bikos mani i sot.

WOK bilong mekim rot long Aitape i go long Malol, Arop, Barupu na Sissano i stop, bikos mani insait long akaun bilong Praim Minista Aitape Fan i pinis. Nau yet, ol komiti bilong dispela akaun i askim pablik na

Global Care i givim tenk na haus tenk long Aitape

WANPELA non gavman grup bilong Austrelia, Global Care i bin go long Aitape long mun i go pinis na i givim 10-pela wara tenk na haus bilong kisim ren wara i go long ol ples tsunami i bagarapim long Julai 17.

Aitape Daiosis Rihabilitesen opis i tok dispela grup i putim pinis dispela ol haus tenk long ol ples we ol i bilip i gutpela na inap givim gutpela sevis long planti pipel.

Kaunseling wok i go het yet

Pater Tom na Joe Apam wantaim tim bilong en i go het yet long mekim kaunseling na pastorel wok long ol pipel insait long ol kea senta. Nau yet ol i lukluk long senisim dispela progam.

Long 1999, ol i tingting long makim wanpela kodineta na tupela kaunseli long skulim ol wokman insait long "Wok Sambai" progam we ol bai skulim ol pastorel woka wantaim sampela moa save ol i

mas gat long wok wantaim ol hevi we bai i stap longpela taim long laip bilong ol pipel i no dai long bagarap bilong tsunami.

Pater Tom i redim pinis ripot bilong wok ol pastorel na kaunseling tim i mekim pinis. Dispela ripot i gutpela long ritim bikos em i soim ples kliaw wanem kain wok ol pastorel na kaunseling tim i mekim pinis. Aitape Daiosis Rihabilitesen Komiti i tok tenkyu i go long olgeta lain i mekim dispela wok.

Sampela ol lain i stap long Pater Antonine senta i go bek long ples

Sampela ol lain tsunami i brukim lek bilong ol na ol i stap long Pater Antonine senta long Aitape i go bek pinis long ples bilong ol. Ol i go bek long ples na stap wantaim ol famili bilong ol, bihain long ol saveman bilong Callan sevis i testim na lukim olsem ol i fit long yusim giaman lek bilong ol.

Wok bilong mekim haus bilong slip bilong ol lain lek bilong ol i bruk long Pater Antonine senta i pinis. Aitape Daiosis Rihabilitesen Komiti i tenkim Rotari Intanesenel bilong Austrelia long helpim bilong ol na tu ol kapenta bilong Aitape Daiosis husat i go pas long wok.

WANTED: "THE TIKTOK GANG"

3 NEW TASTY FLAVOURS ON THE RUN!

- Icecream**
- Lollypop**
- Bubblegum**

REWARD: "GREAT TASTING BISCUIT"

Krismas long hailans i bin namba wan, plis i tok

PETER MAIME i raitim

HAILANS plis i amamas long ol 1998 krismas selebresin long ol provins long hailans bikos planti ples i bin stap isi na i nogat bikipela trabel i bungim ol.

Plantil ol kristen i go bung long ol haus lotu na tingim Bikipela husat i bin kam long graun long dispela de.

Hailans Plis Komanda, Asisten Komisina Mathew Minok i tok amamas long ol pipel long hailans long stap isi na i bin go lotu long onaim de bilong Jisas Kraist. Em i tok, "Jisas em i man bilong bel isi na mi amamas olsem ol pipel i stap gut na i no mekim ol samting we i ken bringim birua long ol narapela manmeri na famili." Em i laik bai ol pipel i mas stap isi olsem long olgeta de long laip bilong ol.

Komanda Minok i tok, long nu yia ol plis bai wok wankain olsem long krismas taim. Em i askim ol olgeta pipel long hailans long save

long banis bilong ol yet na i noken mekim nabaut. Em tu i singaut i go long ol pipel bilong hailans long luksave long lo na tingim laip na wokabout bilong ol narapela manmeri. Em i tok, nu yia tu em wanela spesel de na em i laikim bai ol pipel i mas amamasim dispela de long pasin bilong bel isi.

Ol narapela Provinsel Plis Komanda long hailans tu i sapotim tingting bilong bos bilong ol. Plis Komanda bilong Enga, Suprintenden Allan Kundi i bin mekim bikipela tok tenkyu i go long ol pipel na ol kainkain sios long provins. Em i tok ol sios i mekim gutpela wok na ol pipel i sindaun gut long ples. Suprintenden Kundi i tok, Enga i nau wok long senis na i kamap wanela gutpela provins long hailans na long Papua Niugini. Em i tok long dispela krismas, ol plis i no bungim wanela rot blok, stil o sampela kain trabel long provins. Dispela i mekim na em i amamas tru na laikim bai nu yia i stap isi olsem krismas. Ol plis

long Enga bai wok long san na de long nu yia, Suprintenden Kundi i tok.

Provinsel Plis Komanda bilong Isten hailans, Sief Inspekta Steven Touilly i tok, i no bin gat sampela bikipela trabel long provins. Em i tok olgeta samting i go orait. Wanela liklik birua i bin i kamap, na em long Doti Wara bris, klostu long Heganofi. Wanela ka i bam wantaim narapela bikipela haiwe trak long dispela bris. Ol draiva na ol pasindia i no dai tasol ol i bin kisim sampela bagarap long skin na het, na i bin go long Goroka haus sik.

Wantok i bin traimit long kisim ol stori bilong ol narapela bos bilong plis long hailans provins long telepon tasol em i bin hat. Tasol bikipela samting em, bos bilong olgeta plis long hailans, Asisten Komisina, Minok i bin makim maus bilong ol na i bin toktok pinis long ol samting i bin kamap long krismas na wanem samting bai i kamap long nu yia.

Wes Kambia pipel long Westen Hailans singaut long gavman sevis

PIUS MON i raitim

OL PIPEL bilong West Kambia insait long Nebilyer Distrik long Westen Hailans i belhat long Provinsel Gavman bikos gavman i save pasim ia bilong em, taim ol i save toktok long gavman sevis.

Dispela belhat bilong ol pipel long hap i kam aut gen taim wanela sumatin husat i mekim gret 11 long Santu Fidelis Koles long Madang i pundaun long wara Nebilyer long las mun na indai. Ol bikman long dispela ples wara i karim boi ya i tok, "mipela i lusim 4-pela pipel pinis na indai bilong dispela sumatin i mekim 5."

Piltii Napa, wanela viles sief o bikman bilong Koka Milika haus lain i tok, ol dispela 4-pela man bipo i bin dai long taim bilong waitman. Em i tok tupela i bin pundaun long wanela bris bilong lek na narapela tupela em graun i karamapim ol, taim ol i wokim rot bilong ka i go long West Kambia.

Dispela sumatin i pundaun long wanela lek bris gen taim em i helpim ol pipel bilong em long wokim rot long joinim West Kambia na Tega insait long Nebilyer Distrik. Wara Nebilyer i karim bodi bilong boi ya i go na ol pipel i panim em sampela de bihain.

Ol bikman bilong dispela hap eria i tok, West Kambia bipo yet i kam nau, i no bin kisim gutpela sevis olsem ed pos o liklik haus sik, ol rot na bris. Ol i tok, ol tu i laik kisim ol gutpela sevis olsem ol narapela lain long provins.

"Mi pela i wok long lusim ol laip bilong ol man bikos mipela i laik helpim mipela yet taim gavman i no laik helpim mipela, olsem na mipela i laikim bai Provinsel Gavman bilong tude i mas tingim mipela," wanela viles lida tu long hap, Totip Tar i tok.

Ol pipel long hap i laikim bai Provinsel Gavman i no lus tingting long ol na lusim ol bihain olsem pik na dok.

Goroka haus sik i bin kisim nupela ambulans



• GOROKA haus sik i bin kisim long gavman bilong Australia wanela nupela ambulans aninit long AusAID progrem. Pe bilong dispela ambulans em klostu long K50,000. Long piksa em siaman bilong Goroka bilong Goroka haus sik bodi, Sir Danny Leahy (lep) i sekan wantaim man husat i makim AusAID na tekniko edvaisa bilong Goroka haus suk, Sean Huston, long taim ol bikman bilong haus i bung long kisim dispela ambulans. Long taim ol bikman bilong haus i bung long kisim dispela ambulans. Longsait em wanela sumatin bilong Divain Wod Yunivesiti long Madang, Josepha Ganda husat husat i nau wok pretikol wantaim haus sik i sanap na magalim dispela nupela ambulans. *Poto: Theresa Kumo.*



Gavana Lak kirapim pawa lait long Westen Hailans

PIUS MON i raitim

GAVANA bilong Westen Hailans, Pater Robert Lak i bin tok aut na opim Rurel Ilektrifikesen Progrem bilong provins long Fonde las wik long Nunga Komyunti Skul insait long Dei Distrik. Long dispela taim em i bin givim K156,000 i go long ol pipel long dispela hap long kisim pawa saplai i go long ples bilong ol.

Dispela pawa saplai bai ol i joinim long bikipela pawa lain long Yonki na kisim i go long distrik bilong ol. Gavana Lak taim em i givim dispela mani i tok, pawa saplai bai i go long olgeta hap long Westen Hailans bikos dispela em i wanela plen insait long provinsel plen "Visen 2020." Em i tok, taim provins i bungim 2020, em i dri-man bilong em long kirapim pawa lait long olgeta hap long westen Hailans.

Gavana Lak i tok, long givim gutpela rot bilong ol trenspot, gutpela sistem bilong radio na telefon, gutpela pawa lait na gutpela wara saplai i go long olgeta hap bilong Westen Hailans, dispela em ol bikipela tingting bilong gavman bilong em. Em i laikim bai laip bilong ol pipel bilong Westen Hailans i mas kamap gutpela. Gavana Lak i

tok moa olsem gavman bilong em i bin putim pinis K1.9 milien long baset bilong neks yia long Rurel Ilektrifikesen Progrem na Dei Distrik em i namba wan distrik long kisim K156,000 long baim 13 trensforma bilong pawa lain.

Mema bilong Dei, Puri Ruing i amamas na tokim Pater Lak olsem ol pipel bilong Dei Distrik bai lukautim dispela sevis provinsel gavman i givim ol. Mista Ruing i tokim ol pipel husat i bung long dispela taim olsem, kain sevis i save kamap wanwan taim na em i laikim ol pipel bilong em mas was gut long en. "Sevis i stap wantaim yupela nau, ol i givim long yupela, nau em taim bilong yupela long lukautim," Mista Ruing i tok. Em i tokim ol pipel, dispela ol kain sevis em bilong sensim ol laip stail bilong yupela long ples.

Edministreta bilong Westen Hailans, Dokta Thomas Webster husat tu i bin stap long dispela taim tu i bin askim ol pipel long yusim gut ol dispela kain gavman sevis na tu long lukautim ol pablik sevens. Em i tok, taim ol sevis na ol pipel i stap gut, dispela i mekim ol kainkain sevis long ron olsem wara i go long haus dua bilong ol ples.

Ol pikinini krismas pati long Goroka haus sik

THERESIA KUMO i raitim

OL PIKININI long Goroka haus sik i bin amamas tru taim papa krismas i bungim ol long Fraide moning long las wik na i givim presen long ol.

Papa krismas i bilas na kam bungim ol pikinini na ol nes long fran bilong haus sik. Meri husat i go pas long dispela bung, Jessie Griffiths i tok,

long dispela spesel krismas presen i bin i gat kainkain samting olsem ais krim, keik, osi dring na planti moa. Mis Griffiths i tok, "mi bilip krismas em bilong ol sik manmeri na ol pikinini, na long ol long sindaun nating long ol wod i no gutpela tumas. Em i gutpela long givim sampela naispela samting long ol."

Ekting Dairekta bilong Fainens na Edministresen bilong Goroka haus sik, Lottie

Kawa i tok, haus sik i bin redim dispela de bilong amamasim ol pikinini taim ol narapela pikinini husat i no sik i bung na amamas wantaim ol famili bilong ol ol kainkain gutpela samting. Mis Kawa i tok, "krismas em spesel taim bilong ol pikinini na mipela i no laikim ol stap nating na pilim olsem ol i nogat lain i laikim ol."

Em i tok, sapos ol pikinini ya i stap long ples bilong ol, bai i narakain tasol nau ol i stap

long haus sik. Olsem na ol i traimit long mekim ol i amamas liklik long ol presen na kirapim tingting olsem ol i stap long ples bilong ol.

Ol pikinini i pati long mes o ples kaikai bilong haus sik we ol i kisim ol presen bilong ol. Ol dispela presen, em ol bisinis haus long Goroka i bungim na givim long haus sik. Papa krismas tu i go long ol narapela wod na tok meri krismas long ol sik lain.



Madang Nius

Madang i gat tripela nupela Lokol Level Gavman

WENCESLAUS MAGUN i raitim

MADANG i gat tripela nupela Lokol Level Gavman. Tupela bilong ol dispela nupela Lokol Level Gavman i no stap insait long kaunsel eria. Dispela tupela LLG em long Naiyup na Sangapi na namba tri nupela LLG em Gama, Dairekta bilong Provinsel Afeas na Lokol Level Gavman, Peter Torot i tok.

Em i tok Madang Provinsel Eksekutiv Kaunsel i pasim tok orait pinis long kamapim ol dispela LLG long mun Oktoba na nau dispela ripot i stap long han bilong Minista bilong Provinsel Afeas, Dibara Yagabo bilong glasim na givim i go long Nesenel Eksekutiv Kaunsel long tok orait bipo long Gavana Jenerel i sainim pepa bilong luksave long ol dispela nupela LLG.

Mista Torot i tok ol dispela nupela LLG i stap long ol eria we i no gat rot na i no bin isi long bringim gavman sevis long ol. Disisen bilong kamapim LLG em bilong bringim gavman sevis i go moa klostu long ol.

Em i tok tu olsem opis bilong em i gat plen long stretim olgeta LLG insait long provins long yia 2000. "Sapos i gat sampela wok bilong stretim straksa insait long ol wod eria olsem bilong bungim ol wod na mekim i kamapim wanpela wod mipela bai stretim ol kain hevi olsem. Ol bikipela hevi tru em bai mipela i larim i stap na stretim long bihain taim," Mista Torot i tok.

Narapela eria Madang Provinsel Gavman i glasim na tingting long kamapim LLG tu em Vanuma. Mista Torot i tok, Vanuma i paul bikos ol i bruk aninit long tripela ilektoret. Tasol i gat wanpela lo insait long Ogenik Lo we i toktok long amendmens sapos i gat as bilong stretim. "Mipela bai stretim dispela hevi na brukim Vanuma long ol dispela tripela ilektoret bikos mipela i laikim gavman sevis i mas go long ol pipel," Mista Torot i tok.

Em i tok bipo Usino Bundi i bin stap olsem wanpela bikipela LLG wantaim 40 wod. Tasol nau opis bilong em i brukim na kamapim Simba na Midel Ramu olsem wanpela wod.

Narapela hevi opis bilong em i lukim tu em taim Gavman bilong Morobe i kamapim Yus LLG insait long Teptep long boda bilong Madang. Mista Torot i tok dispela i mekim ol pipel bilong Yus i paul. Morobe Gavana, Luther Wenge i kalapim boda na Gavana Jim Kas long kam na kamapim LLG bilong Morobe insait long Madang Provins. Em i brukim lo na olsem mipela i mas kamapim wanpela LLG long Yus," Mista Torot i tok.

Midel Ramu pipel i gat kain kain sik, UNICEF ripot i tok

BEN TAUMAI i raitim

MIDEL Ramu Iektoret insait long Madang Provins, i no gat gutpela skul long we bilong lukautim ol wan wan famili, namba bilong ol pipel i gat sik Malaria i antap tru, i gat malnutrisen, ol pipel i no kisim skul bilong imunaisesen na sampela moa ol kainkain sik, man husat i go pas long wok bilong Yunaited Nesens Intanesenel Pikinini Edukesen Fan (UNICEF) long Madang, Markus Kachau i tok.

Em i wok tu olsem asisten edvaise bilong in-sevis trening long provinsel helt opis. Mista Kachau i tok UNICEF i painim olsem i gat bikipela hevi tru long ol pipel bilong Midel Ramu na ol i laik traim helpim ol long stretim na kamapim gutpela sindaun bilong ol. UNICEF bai traim tu long helpim ol pipel bilong Midel Ramu long sait bilong sosel developmen, wok didiman, bisnis na edukesen. Em i tok ol bai wok i go inap long tripela yia. Tasol

em i no tok amas kos bilong wokim dispela wok long wan wan yia. Dispela toksave bai kamap bihain long stat bilong 1999 taim UNICEF na Madang Provinsel Gavman i sainim tok orait long mekim dispela wok.

UNICEF i redim pinis wanpela ripot i tokaut long wanem kain hevi ol pipel bilong Midel Ramu i gat na wanem kain rot bilong helpim ol. Ol i salim pinis dispela ripot i go long ol bos bilong Madang Provinsel Gavman bai ol i ken glasim na sapos ol i wanbel orait ol i ken sainim long 1999.

Mista Kachau i tok het opis bilong karim aut dispela wok bai i stap long Aiome gavman stesin na tupela trensmiting stesin bai stap long Josepstal na Simbai.

Em i tok tok ol wokman na meri bilong UNICEF na ol wokman na meri bilong Madang provinsel helt opis, i stat pinis long wok insait long tripela Lokol Level Gavman long Midel Ramu. Ol i pinisim wok painim i go insait long nutrisen, bilong mekim plen bilong wok bilong ol long 1999.



• Long Ailan i stap long Madang Provins. Tasol ol pipel bilong Long Ailan i no kisim bikipela luksave i kam long provinsel gavman. Ol i gat gutpela graun na wara bilong mekim bisnis bilong Kopra, na ol arapela samting. Wanpela famili bilong Long Ailan i draim kopra bilong ol long san, taim ripota Wenceslaus Magun i bungim ol.

Madang Taun Atoriti mas stopim ol lain i salim buai long taun

MADANG Taun Atoriti mas stopim ol lain i salim buai long Madang taun. Dispela em wanpela strongpela singaut i kam long wanpela longtaim pablik sevan long Madang, Masuda Labong.

Mista Labong i mekim dispela askim bikos long dispela taim, i gat planti man na meri i wok long salim buai long taun. Ol lain i kaikai buai i troimoi pipia nabaut na spet nabaut long taun. Ol i kamapim planti pipia, na mekim taun i smel.

Em i tok, Madang taun nau i no luk gutpela olsem bipo. Nogat. Ol gras i gro i go antap, ol pipia i pulap nabaut na blulang i plai raun long ol ples i gat pipia. Dispela i no gutpela bikos Madang i gat nem long kantri na long Saut Pasifik olsem em i wanpela smatpela taun.

"Ol taun kaunsel wantaim helt inspekta bilong ol, provinsel edministresen, provinsel gavman, na ol plis i stap we? Ating ol wok long kisim mani nating na raun nating long ka? Ol i mas stretim dispela hevi kwik," Mista Labong i tok.

Em i tok planti bilong ol lain i save salim buai long pes bilong ol stoa long Madang taun em ol Hailens na ol i bagarapim tru taun bilong Madang.

"Sapos yu go mekim wankain samting olsem long Hailens, ol bai i no inap isi long yu. Nogat tru! Mi ting em i gutpela ol i mas go na mekim kain pasin bilong ol long Hailens. Mi no save lukim ol asples Madang i salim buai nabaut long taun. I luk olsem ol Hailens i laik tekova long Madang taun," em i tok.

Labong i laikim tu ol helt inspekta long tambuim ol man na meri long salim ol lus simuk nabaut long taun. Na sekim ol haus kaikai long taun bikos ol i wok long salim ol olupela kaikai bilong wanpela o tupela de we ol i no salim na putim i stap long aisbokis na bihain ol i hatim na salim gen.

Em i tok, sapos ol taun atoriti i no mekim wanpela samting, em bai tokim ol asples yet long go na salim buai long taun maket stret na i no long foa mail o Sagalau maket.

KIWURAM KANAKO i raitim

REDIO Madang i pasim olgeta wok brodkas bilong en long las wik Fonde bihain long wanpela bikipela asua i kamap long ol masin bilong en long Baitabag.

Wanpela mausman bilong Redio Madang, husat i no laik kolim nem bilong em i tok olsem, dispela ol masin i bin stap long Baitabag taim redio stesin i statim wok brodkas bilong en long

Oktoba 3, long yia 1971. "Ol dispela tupela masin em long module sen valv na fets trensista. Dispela module sen valv i save skelim wok bilong wailis i kam insait long redio stesin na wok brodkas we i save go ausait. Dispela fets trensista em bilong helpim tu wok bilong salim brodkas i go ausait," mausman ya i tok.

Prais bilong dispela tupela masin wantaim kastom takis na hendling sas i sanap long K23,000 olgeta. Ol dispela masin bai kam stret long Kalifornia, long Amerika.

"Mipela i save olsem Madang Provinsel Gavman i save long hevi bilong Redio Madang na mipela i bilip ol inap long helpim mipela long kisim dispela ol masin," mausman i tok.

Em i tok sore tru i go long olgeta manmeri bilong Madang olsem redio stesin bai pas na ol i mas wet tasol inap ol dispela nupela masin i kamap long kantri.

"Mi save olsem redio em wanpela bikipela rot bilong harim toksave, nius, musik na planti arapela samting

bilong helpim ol manmeri long ol ples insait long provins. Na tu ol inap save long wanem kainkain samting i kamap long arapela provins insait long kantri," em i tok.

Wantok i save olsem Redio Madang i bin stat long sotim taim bilong em long mekim wok brodkas bilong en long wanpela wik i go pinis. Na tu ol dispela asua wantaim ol masin i save stapim wok brodkas long wan wan de. "Ol wokmanmeri i save painim hevi taim

ol i wok long nait bikos olgeta masin bai i dai na ol save wet inap 20 minit na wok gen. Mipela i tok sapos dispela kain pasin i kamap olgeta taim, ol arapela masin tu bai bagarap. Olsem na mipela i laik givim malolo long ol masin," mausman i tok.

Nesenel Brodkasting Komisen long Mosbi i save long dispela hevi na i tokim ol lain bilong Redio Madang long mekim wanem samting ol i ting i gutpela long stretim dispela hevi.

Redio Madang i pas

Lae Nius

36 kalabus lain long Buimo i go fri

YAKAM KELO i raitim

PRAIM Minista Bill Skate i rausim pinis 36 kalabus manmeri bilong Buimo haus kalabus long Lae long las wik Krismas wiken.

Praim Minista i rausim ol dispela kalabus lain wantaim planti arapela kalabus lain insait long ol arapela haus kalabus long kantri. Mak bilong olgeta kalabus lain Praim Minista i bin rausim insait long Papua Niugini i olsem 115. Dispela em wanpela pawa bilong Praim Minista long mekim olgeta yia long rausim wanpela o

tupela kalabus lain long haus kalabus. Dispela em pawa bilong marimari we olgeta Praim Minista i gat long mekim long olgeta yia.

Insait long Buimo haus kalabus long Lae, Praim Minista Bill Skate i tokaut long nem bilong ol em:

John Valimo, Anonga Scorpion, Francis Daffa, Jeffery Lapan, Steven Maia, Gilbert Ipmawara, Dickson Opale, Jacob Papa, Daniel Steven, Gaidu Leo, Kevin Gambu, Alundi Watu, Ben Omasi, Gisoa Adanga, Venon John, Francis Aimis, Timothy Tom, Wanpis Seibi, Lemeki Koikoi, James Angu,

Enos Sael, Samuel Ronald, Mana Lista, Dala Mange, Yama John, Rudolf Sarak, Augustine Wapak, Joesph Tai, Kingsley James, Junaii Tinga, Dope Matti, Toa Peter, Martha Laviong, Monica Lonson, Lina Miama na Margret Gubab.

Dispela em i namba wan taim wanpela Praim Minista bilong Papua Niugini i mekim dispela kain pasin aninit long pawa bilong marimari em i gat. Lo bilong kantri i luksave long dispela na Mista Skate i mekim dispela.

Praim Minista Bill Skate i tok em ino rausim ol nating. Em i save planti bilong ol

i kamap lapun pinis, sampela i gat sik, taim bilong ol long pinis i kamap klostu pinis na tu em i save ol i kamap gutpela manmeri.

Ol i senis na ol bai sindaun gut long komyuniti wantaim famili bilong ol gen.

Mista Skate i tok em i skelim gut tru nem na rekot bilong ol dispela kalabus lain na em i save olsem nogat wanpela bilong ol em ol biknem raskel na trabel lain.

Ol i gutpela manmeri na ol i no inap kamapim pret o birua long komyuniti taim ol i go bek stap wantaim ol lain famili bilong oi.

6-pela manki holim mama long kas

BULOLO RIPOT

YAKAM KELO i raitim

OL PLISMAN i no laik westim taim long stretim birua we ol meri yet i pusim long i kamap long ol, Ekting Provinsel Plis Komanda bilong Morobe provins Simon Yipam i tok.

Mista Yipam i mekim dispela toktok bihain long 6-pela yangpela manki i bin go hensapim sampela lain i bin sindaun pilai kas long Bulolo taun long dispela wik. Bihain long ol hensapim ol dispela lain i pilai kas, ol i kisim wanpela mama na bagarapim em. Mista Yipam i tok sapos mama ya i stap isi long haus na mekim gaden o mekim gutpela wok bilong famili na kain hevi olsem i kamap, em plis bai givim moa taim long helpim em.

Mista Yipam i tok i no gutpela long ol meri go long danis o pilai laki olsem na bungim dispela kain hevi bikos ol plisman i gat planti wok long mekim long arapela hevi. Olsem na ol meri i mas yusim gut het bilong ol na sindaun isi na noken pulim trabel i kam long ol, em i tok. Plis long Bulolo i holim pinis 6-pela yangpela man ya na sasim ol long bagarapim mama ya.

Long Bulolo eria, Mista Yipam i tok pasin ol raskel man i bin mekim long ol lain pasindia long las wik namel long Bulolo Forestri i no gutpela tru. Dispela em olsem pasin bilong ol sikman. Mista Yipam i mekim dispela toktok bihain long ol sampela raskelman i bin kilim wanpela yangpela boi taim ol i bin hensapim ol pinis na kisim ol mani na kago bilong ol.

Bihain ol i askim ol long go bek antap long pmv na ol i sutim dispela yangpela boi wantaim sotgan na em i dai. Mista Yipam i tok ol raskel lain ya i kisim ol samting ol i laikim pinis tasol bilong wanem tru na ol i bagarapim laip bilong yangpela boi ya?.

Em i tok ol plisman long Bulolo i wok long painim ol dispela lain yet. Em i askim tu ol manmeri long Bulolo eria long helpim plis wantaim ol toksave insait long dispela birua bilong ol raskelman ya.

Edita na ol niusman bilong WANTOK NIUSPEPA i laik tok Hepi Niu Yia long olgeta rida bilong Lae Nius. Lukim yu gen long 1999.

Morobe Gavman pasim 1999 baset

MOROBE provinsel gavman i brukim pinis K76 milien provinset baset bilong em long Tunde las wik.


Dispela em wanpela bikpela baset long skelim wantaim ol arapela provinsel gavman insait long kantri. Insait long dispela baset nesanel gavman i bin givim K42 milien i go long Morobe provins.

Na provins yet i bin kamapim mani mak olsem K34 milien we i bungim wantaim na kamapim olsem K76 milien baset bilong Morobe provins long 1999.

Gavana bilong provins Luther Wenge i tok em i amamas long wanem nesanel gavman i bin wanbel na oraitim baset plen bilong Morobe we i mekim isi long asembli i sindaun na brukim long las wik.

"Nesanel gavman i lukim dispela baset wantaim plen bilong en na oraitim. Na tu, mipela i namba wan provins long putim dispela baset long pepa i go long Tresera na em i tok yesa tasol," Mista Wenge i tok.

Minista bilong Treseri na Kopret Afeas lairo Lasaro i bin oraitim dispela mani plen bilong Morobe Gavman taim ol i bin



• Gavana bilong Morobe, Luther Wenge.

salim i go long kisim orait bilong brukim baset.

Dispela i mekim Morobe provins i bin namba wan provins long kisim tok orait bilong Gavan long brukim provinset baset bilong em. Dispela em rot bilong olgeta baset plen i mas go bek long

Fainens opis long Waigani long glasim na skelim pastaim long ol i oraitim bilong ol provins i ken brukim baset bilong ol.

Morobe provinsel asembli i bin sindaun long Tunde dispela wik na skelim toktok na brukim dispela 1999 baset bilong provins.

Dispela baset bai i go long karim ol wok bilong provins long sait bilong ol sevis na developmen na ol kain kain wok bilong sevim ol pipel bilong Morobe na kirapim provins.

Mista Wenge i tok wanwan kaunsel presiden bai kisim K50,000 bilong karim i go long wanwan kaunsel eria bilong ol.

"Ol inap long kisim K100,000 tasol hevi bilong nesanel gavman i mekim na ol i bin rausim K1 milien. Olsem na ol bai kisim K50,000 tasol."

Mista Wenge i tok tu olsem dispela em namba wan taim em bai kisim kain mani olsem. Gavman tu i strongim toktok insait long ol wok developmen olsem bris, rot, ples balus, agrikalsa o wok didiman na Edukesen. Ol dispela samting em namba wan tingting bilong Gavman bilong Morobe provins.

Mumeng kaunsel i sapotim lo na oda

PPC RIPOT

YAKAM KELO i raitim

EKTING Provinsel Plis Komanda bilong Morobe provins Simon Yipam i tok amamas i go long Morobe edministresen long sapotim wok bilong plis fos insait long provins long dispela yia na ol yia bipo.

Mista Yipam i tok amamas long Gavana Luther Wenge na gavman bilong em, edministreta Aine Sengero, ol kaunsel bilong provins na lokol gavman kaunsel long wanwan distrik long gutpela wok helpim na sapot bilong ol long lo na oda wok insait long provins.

Mista Yipam i mekim dispela toktok taim em i witesim Mumeng lokol gavman kaunsel i givim ol nupela yunifom bilong Mumeng plis long Tunde dispela wik. Dispela yunifom bai ol i givim long ol spesel plisman bilong wok wantaim ol plisman bilong Mumeng long karimaut lo na oda. Ekting PPC Mista Yipam i amamas tru long gutpela helpim na sapot Mumeng kaunsel i mekim long helpim ol plisman long wok bilong ol. Em i tok Mumeng i soim gutpela piksa tru insait long Morobe provins long kain gutpela wok bung wantaim bilong plis na kaunsel insait long distrik.

Em i mekim bikpela tok amamas i go long Mumeng kaunsel presiden na siaman, ol pipel na memba bilong Bulolo ilektoret Samson Napo long sapotim Mumeng plis wantaim nupela plis ka.

Mumeng i bin kisim sapot tu long opim opis bilong ol i go bikpela, ol i kisim nupela plis ka bilong yusim long wok na nau ol i gat ol nupela yunifom bilong ol spesel plisfos insait long distrik.

Em i tok dispela sapot bilong plis i mekim na ol i bin mekim gutpela wok long krismas taim long haiwe bilong Mumeng.

Ol hap olsem Wara Kalap na Bundun we planti trabel i save kamap long bipo i nogat trabel long dispela taim bilong krismas bikos ol plisman i bin mekim gutpela wok.

Mista Yipam i askim long dispela kain sapot na wok bung wantaim i mas stap yet wantaim ol plis na gavman bilong Morobe provins long strongim wok bilong lo na oda insait long provins.

Em i mekim bikpela tok amamas tu i go long olgeta stesin komanda bilong ol plis insait long Morobe provins long gutpela wok ol i mekim long las yia i kam dispela yia. Na em i askim ol long holim yet gutpela wok bilong ol long neks yia i go.

Wimens grup long Sentrel provins bai rejista

KENNEDY EDENE i raitim

PRESIDEN bilong Hiri Distrik Wimens Kaunsel (HDWC) Elizabeth Womala i tok amamas long ol mama bilong Befa Wimens Kaunsel insait long Sogeri, Sentrel provins.

Em i tok Befa Wimens wod i bin soim wok tru we ol arapela wod i mas lukluk long en na kisim tingting na aidia na stretim gut kaunsel bilong ol.

Misis Womala wantaim vais presiden bilong em Inoa Kopi i bin raun lukluk long wok bilong ol wimens grup insait long Sogeri na tok ol i amamas tru long lukim gutpela wok tru ol wimens kaunsel insait long Sogeri i bin kamapim insait long ol progrem bilong ol.

Sampela long dispela progrem em ol meri i mekim ol stail liklik gaden arere long banis bilong ol we ol planim kain kain kaikai bilong helpim bodi bilong ol we ol i kolim nutrisen gaden.

Bikpela tingting bilong dispela raun bilong presiden na namba tu bilong em, em long toksave long ol mama long redim ol yet long rejistaim wod bilong ol bikos neks yia bai i gat wanwan distrik treseri ol bai putim kamap.

Wanwan distrik treseri long distrik helpim ol mama long kisim mani long wokim ol liklik wok projek ol i laikim long mekim i kamap.

Rejistresen fi em K20 long wanpela wod long rejistaim ol wod i go long Sogeri eria long wimens kaunsel.

Misis Kopi i tok tu olsem dispela em i kam aninit long nupela rifom sistem we wanwan wod kaunsel i mas stretim na redim ol wod bilong ol na em i ken oraitim ol wod long mekim lon o kisim dina long mekim ol liklik wok projek bilong ol.

Sogeri eria wimens kaunsel em memba long Hiri Distrik Wimens Kaunsel insait long Sentrel provins.

Ol redio stesin pas long Sauten rijon

IAN KAKARERE i raitim

MENESA bilong Redio Westen Robin Wainetti i askim provinsel gavman insait long Sauten rijon long sapatim wok bilong Nesenel Brodkasting Komisnin (NBC) insait long wanwan provins bilong ol.

Mista Wainetti i tok ol redio stesin insait long Sauten rijon i no wok moa bikos ol i sot long mani bilong mekim wok bilong ol i go het. Em i tok insait long arapela provins, ol provinsel gavman bilong ol i save sapatim na lukautim redio stesin bilong ol we ol i save wok long

givism ol toksave, nius na arapela pilai olsem musik na planti arapela gutpela progrem bilong ol manmeri i lainim na kisim save long ol.

Dispela wok bilong sapatim ol provinsel redio stesin i kam aninit pinis long lukaut bilong ol provinsel gavman aninit long rifom sistem bilong dispela kantri.

Redio Milen Be long Alotau, Redio Noten long Oro provins, Redio Sentrel long Mosbi, Redio Galp long Kerema na Redio Westen long Daru olgata i no mekim wok bilong ol moa na pasim wok bilong ol pinis. Tasol Mista Wainetti i tok em i bikpela samting

long ol pipel i mas gat sampela kain samting bilong harim na amamas long en.

Em i tok sevis bilong redio em bikpela samting long ol pipel bilong Westen provins bikos i gat mak olsem 19,000 manmeri i stap long Daru ailan na i nogat ol gutpela samting long mekim long spea taim bilong ol.

Em i askim EM-TV (televisen) long sanapim trensmitta bilong ol long Daru na Daru taun atoriti i mas kamapim ol banis o hap bilong pilai spot o danis na mekim ol arapela sosel wok na pilai bai i gat planti sans bilong ol manmeri i amamasim ol yet.

Jas i no amamas long Kiunga haus kalabus

Nesenel Kot Jas Jastis Karo Vagi i bin amamas long ol lokol atoriti bilong Westen provins long kamapim gut Kiunga Kot Haus bai ol kot i ken kamap gut long en.

Jas Vagi i bin mekim wanpela kot raun bilong em long Kiunga taim em i lukim ol dispela senis i kamap.

Tasol Mista Vagi i no amamas long haus kalabus lain (CIS) long i no stretim gut Daru na Ningerum haus kalabus we tupela haus kalabus ya i kamap nogut tru we i no inap long lukautim ol kalabusman olsem na ol i pasim pinis.


Mista Vagi i tok long Novemba, em i bin sasim sampela lain long sas we ol inap long stap long kalabus. Tasol bikos haus kalabus i no gutpela, ol i bin lusim ol i stap aninit gud bihevia bod.

Em i tok i nogat narapela rot moa long kalabusim ol bikhet man olsem na em i larim ol i go bek ron long rot wantaim ol pipel bikos ol haus kalabus i nogat gutpela long Daru na Ningerum.

Tasol em i tok amamas long wok bilong stretim gut olpela Kiunga lokol gavman kaunsel samba i go kamap kot haus nau.

Jas Vagi i tok nau pawa saplai i go insait long dispela kot haus na bai i mekim isi long ol jas, mejistret na ol wokman long wok gut bikos long gutpela lait na ea kondisen long kot haus.

Em i tok bai em i mekim ripot i go long Judisel Sevis dipatmen olsem Kiunga em gutpela hap



• Kiunga Distrik kot haus long 1986. Helt inspekta i putim tambu na ol trabelman i amamas nau long 1998 gutpela kot haus i stap.

bilong holim ol Nesenel Kot long hap.

Long dispela taim nau, Ok Tedi Maining Limited aninit long gavman takis kredit Skim bai yusim

K1.5 milien long stretim ol haus kalabus long 1999. Ol samting bai kampani i stretim em hap bilong kukim ol kaikai, na mes bilong sindaun kaikai,

8-pela haus slip bilong ol woda wokman, 15 singel bareks na wanpela liklik klinik.

Dispela wok bai stat sotpela taim bihain.



• Ol sampela yut bilong Tabubil long Westen provins i raun long hap yet na mekim wok misin. Foto: Patrick Levo.

6-pela wod long Hiri lokol gavman eria nogat mausman

OLPELA memba Emmenuel Ume i singaut i go long nesenel gavman long kamapim ileksen bilong 6-pela wods insait long Hiri lokol level gavman kaunsel bikos ol i nogat mausman long makim ol insait long Sentrel provinsel asembli.

Mista Ume i tok ol pipel bilong ol dispela hap wod i nogat kaunsel long tupela kristmas nau na ol i no kisim wanpela gutpela sevis i kam long Sentrel provinsel gavman.

Em i kolim ol dispela wod olsem wod 13, 14, 15, 16, 17 na long wod 18. Na ples Manumanu na go long Gaire viles ol i bin makim mausman bilong ol longtaim.

Mista Ume i mekim dispela toktok makim ol pipel long hap bilong Vanapa Braun Riva eria we ol i kam aninit long Hiri lokol level gavman.

Long tupela yia kam nau, mipela i nogat provinsel baset na i luk olsem bai mipela ino gat gen long neks yia 1999 inap mipela i gat mausman long provinsel asembli, em i tokaut.

Mista Ume i tok i nogat gutpela helt sevis, viles kot na arapela sosel sevis em bikpela hevi long ol.

Em i tok hevi bilong raskel pasin i kamap bikpela bikos i nogat gutpela gavman sevis na sapatim olsem na ol i stap wantaim bel hevi nau.

Em i laikim gavman long hariap kamapim ileksen bilong ol kaunsel bai ol i ken i gat man i makim ol long bringim nem bilong ol i go insait long baset bilong provinsel gavman we i ken kamapim sampela gutpela sevis na wok insait long wod eria bilong ol.

WANTOK spots wilken

Morobe kantri i gat nupela klap

MOROBE Kantri i gat wanpela nupela ragbi lig klap. Dispela klap em ol yangpela bilong Kamkumung na Hausing Komisn i statim.

Menesa Steve Robbie i tok dispela klap bai putim 4-pela tim long bihainim lo bilong Morobe Kantri Ragbi Lig Asoseisen. Robbie i tok em i statim dispela klap long givim

sans long ol yangpela husat i no save pilai long soim stail. Nau yet i gat ol klap tasol dispela i save pulap ya.

Em i tok em bai kosim dispela klap na givim gutpela salens i go long ol biknem tim bilong Morobe Kantri. Wanpela biknem pilaia Nua Narakou bai go pas long dispela

tim olsem kepten bikos em i gat eksperiens long pilaia. Narakou i save pilai wantaim Kokopo Muruks long Is Nu Briten Ragbi Lig. Robbie i singaut i go long olgeta yangpela long Kamkumung na Hausing Komisn kompaun long kamap long wanpela miting long Januari 7. Insait long dispela miting, ol bai

stretim nem bilong ol pilaia na tu bungim mani long baim fi bilong ol i go long Morobe Kantri ragbi lig asosiesen.

Sampela ol nem bilong pilaia em Johnson Tobias, Kevin Lipun, Steven Kaupa, Michael Barnabas, Johnson Asu, Eddie Piasi, Benny Gene, John Buckley, Steven

Robbie, Narakou, Timson Timson, Eric Mal, Johnson, Topia Gagma, Mal, Paul Maima, Liu Abane na Tony Olape. Morobe Kantri ragbi lig asosiesen i bai holim jeneral miting bilong em long niu yia. Na dispela em i sans bilong ol yangpela long givim nem na stap insait long dispela ragbi lig kompetisen.

The Board, Management and Staff of PANGTEL would like to wish:

- Hon. Dr. Fabian Pok, MP, Minister for Public Enterprises & Communication and the staff;
- Hon. George Wan, MP, Vice Minister responsible for Communication and the staff;
- The National Government under the leadership of the Prime Minister, Hon. Bill Skate, CMC, MP;
- The Opposition under the leadership of Hon. Bernard Narokobi, LLB, MP;
- All those valued Sponsors of the APFC TEL IS Meeting;
- All the valued service providers particularly Telikom PNG Ltd and the Telecommunication (including Broadcasting) industry at large.

Blessed Christmas and a Prosperous New Year (1999)

For all telecommunications, radiocommunications and broadcasting licencing and regulatory related inquiries please contact:

PANGTEL HEAD OFFICE:
Telephone: 325 8633 - Facsimile: 325 6868
P O Box 844, BOROKO, National Capital District

Regional Office - Lae
Telephone: 472 5120, 472 5121, 472 5122,
Facsimile: 472 1045
P O Box 2424, LAE, Morobe Province

PANGTEL

PANGTEL WEBSITE: www.pangtel.gov.pg
Authorised By:
PHILLIP AEAVA - DIRECTOR GENERAL

Papua New Guinea Telecommunication Authority

Resis bilong Gavana Kap ragbi lig kompetisen pulim moa sapota

MATHEW YAKAI i raitim

BIKPELA ragbi lig kompetisen long Krismas, Gavana Kap, long Kone Tigers oval long Pot Mosbi i pulim moa sapota.

Sevenpela tim olgeta i bin stap insait long dispela ragbi lig resis. Gem i bin stat long Fraide na pinis long Sande we tupela tim bai pilai long fainel.

Morata Bullets i go pas long poin lata. Na Morata Swans na Hohola Tu i sindaun long namba tu ples wantaim seven poin.

Gutpela gem las wiken i bin stap namel long Morata Swans na Hohola Tu. Dispela gem i strong tru tasol Swans i gat ol biknem pilaia olsem na ol i win.

Tasol Hohola Tu i komplem long opisel olsem Swans i larim tripela biknem pilaia i pilai long sem tim we i no stret long rul bilong pilai. Olsem na ol komiti bai skelim dispela apil na mekim disisen bilong em.

Hohola Tu i tok olsem Obert Batia, Cedric Belo, Domic Rema na Billy Yaki, ol i save pilai long inta siti gem na brukim rul long larim olgeta pilaia i pilai semtaim long wanpela tim.

Bihain long dispela miting, ol i rausim poin na givim i go long Hohola 2.

Morata United wantaim Hohola 1 i sanap namba tri ples wantaim 6 points na 9 Mile Grave Diggers i ran 4 ples wantaim 4 points. Konedobu Sharks i kam las wantaim 3 points.

Kodineta bilong Gavana Kap Salens, Bill Kito i tok olsem raun six na seven Fraide, Januari 1, 1999. Na long Sande bai i gat grenfainel.

Ol tim i wok long pilai strong tru long kamap long namba wan ples long bai gat sans long winim Gavanas Kap.

Bikpela gem tru i bin kamap namel long Morata Swans na Hohola 2. Dispela gem i mekim ol man i no sindaun isi. Ol i wok long sanap na kalap long sapotim tim bilong ol. Tupela sait wantaim i strong tasol Swan i gat eksperiens long win.

Ol mangi Morata i gat bikpela sans long winim dispela pilai bikos ol i gat sampela biknem pilaia olsem Batia, Belo, Rema na Billy Yaki i stap long tim.

Planti manmeri i ting olsem Morata Swans bai wilwilim ol Hohola tasol tingting bilong ol i wara nating taim Hohola i soim tru stail bilong ol.

Tasol tarangu, ol opisal i bin givim dispela point long ol Hohola 2 bihain long ol i painim aut olsem Swans i gat tripela pilaia i stap long tim.

Kodineta Bill i tok olsem ol tim i lid long sko bai pilai final. Sapos tupela tim i gat sem poin, ol bai skelim long namba bilong ol gol.



• Nesenal yut Kosa Ludwig Peka, Sapos em i stap yet, bai kisim PNG anda 19 i go long Fiji neks yia.

Miting bilong junia lig long Januari 30

PNGRFL

PAPUA Niugini Ragbi Futbol Lig bai statim sisen bilong em wantaim jenerel miting bilong PNG junia ragbi lig. Dispela miting bai kamap long Januari 30.

Nesenal junia developmen opisa long Goroka Joe Tokam i

tok olsem dispela miting i bikpela we ol toktok bilong developmen ragbi lig bai kamap.

Tokam i tok las mun PNGRFL i oraitim konstitusen bilong junia ragbi lig long wanpela jenerel miting bilong en. Dispela miting tu bai makim ol opisel bilong PNGRFL na tu toktok bilong sponsa, Coca Cola.

Em i tok dispela sponsasip bai lukautim developmen bilong kos bilong kosa, trena, tim menesa, referi na ol teknikel opisel long lukautim junia klap na tim.

Sapos wanem ol lain i laik kisim moa toksave i ken ringim Tokam long 7321680 of feks long 7321516.

Las de bilong baim afiliesen fi

TUDE em i las de bilong ol ragbi klab insait long Goroka long baim afiliesen fi o sapos nogat, Goroka ragbi lig bai rausim long pilai.

Papua Niugini Ragbi Futbol Lig i oraitim ol asosiesen long oraitim pinis long katim daun namba bilong ol tim long 10 i kamdaun long siks sapos ol i no bai afiliesen fi hariap.

Siaman bilong Gem komiti Nathan Mote i tok olsem tripela klab tasol i bin baim fi bilong ol. Na olpela primia tim Tarangau i baim hap pe tasol. Na ol opisel i laik olgeta fi i mas pinis fi bilong ol na olpela klab Tarangau em bin peim hap tasol.

Em i askim kwik olpela klap

long baim fi bikos planti ol nupela klap i soim laik long pilai tu ya.

Wanpela olpela tim olsem Hawks i soim bikpela laik pinis long joinim kompetisen na sapos wanem ol olpela klap i no baim kwik fi bilong ol, Hawks bai kisim ples bilong ol tasol ya.

Hawks em tim bilong ol mangi Kabiyufa husat i gat nem long gut taim long 1970 na 80-. Na tu ol i save pilai aninit long nem Rongo Tigers.

President bilong Tigers, Ennie Biari i statim gen Hawks bihain long klap i bungim sampela hevi. Em i gat strongpela tingting tru olsem Hawks ba i gat sans long joinim klap ya.

Mote i tok planti taim presi-

den bilong Goroka Ragbi Lig Jacob Aero i tok olsem ol klab i kam pas na soim interest long em bai i gat sans long pilai.

Mote i tok tu olsem ol klab i mas afiliet wantaim ripot bilong tresera, ripot bilong president na klap AGM ripot. Ol klab i no mekim dispela i soim olsem ol i no bihainim laik bilong PNGRFL na Goroka Lig.

Tenpela tim bai pilai long kompetisen long neks yia Norths, Royals, Tarangau, Magani, United, Panters Country, Raiders na Brothers.

Na ol klab husat i baim afiliesen fi em long Norths, Panters, Tigers (Hawks) na Tarangau

Danga i go pas long Piswara Eels

GAHUKU OP SISEN LIG RIPOT

MAN BILONG brukim strongpela difens na pilaia bilong Goroka Royals Peter Danga i bin soim aut stail bilong em stret long Sande taim em i go pas long Piswara Eels long winim Lisapeka Bulldogs 16-8 long Gahuku op sisen lig long Goroka.

Danga i no bin givim sans long difens bilong Bulldogs maski ol wanpilai bilong em olsem John Markham, Dikson Gene na Ben Gene i stap insait long Bulldogs.

Em bin putim tupela trai long namba wan hap na pinisim gem wantaim wanpela trai long seken hap long helpim tim bilong em i win.

Long beklain bilong Eels i bin gat Pukpuk tren squad olsem Mack Siwi i bung wantaim David Pokana long senta na fulbek Moses Iko, faiv-et Jobby Avani na Nelson Gensa i kamapim strongpela pawa long beklain.

Bihain long Danga i putim wanpela trai insait long seken minit, tupela tim i wok long ran strong we i mekim ol i pairapim stret bun bilong ol.

Kik i bin go insait we ol Eels i wok long lid. Tasol bian liklik taim tasol ol Bulldogs i bekim wantaim

wanpela trai na sko i sanap olsem 4-6, we kik i no go insait.

Man, Danga i bin ran fri i go long putim seken trai bilong em bian long skram tasol kik i no bin go insait na sko i sanap olsem 10-4.

Long seken hap, Bulldogs i bin salem masel man bilong ol, John Yalida Mogia na Dikson Gene taim Eels i bringim bodi biulda, Big Joe. Dispela i bin mekim ol manmeri i sanap na sindaun long Independence Pak taim tupela tim i wok long soim masel.

Bulldogs i bin gat sans long putim trai tasol strongpela difens bilong Eels i pasim doa bilong trai taim Danga i ran gen i go long putim las trai bilong Eels long sko bod.

Jobby Avani bin kik i go insait we Eels i lid wantaim 16-4 taim i gat 5-pela minit tasol long pilai.

Insait long 5-pela minit, ol Bulldogs i bin putim wanpela trai tasol taim i sot na ol Eels i win wantaim 16-8.

Long ol narapela gem, Nangami Souths i wilwilim Jogi Raiders 20-nil, Okuifa Hawks pinatim North Pinats 12-4 na Hella Massy kurakumim East Sitani 20-8.

1998 soka sisen em gutpela, Mommers i tok

SOKA RIPOT

PRESIDEN bilong Papua Niugini Futbol Asosiesen (PNGFA) Peter Mommers i tok 1998 soka sisen i gutpela.

Em i tok bikpela samting tru long dispela sisen em PNG wimens soka tim i soim olsem ol i redi pinis long winim gol medal long Saut Pasifik Gems long Guam. Ol meri PNG i save stap insait long bikpela kik resis egens long Nu Silan na Australia. Na dispela i givim gutpela sans long winim gol medal.

Mommers i tok ol wimens tim i mas stretim yet difens bilong ol. Na dispela em wok bilong ol kosa na ol edministreta long wanwan soka senta long lukim olsem ol wimens tim i mas kisim gutpela trening na kosing. Em i tok olsem olgeta bikpela soka tonamen i bin kamap gut tru. Na em i soim olsem, PNGFA i ken mekim wok bilong sapos olgeta opisel na pilaia i wok bungwantaim.

Presiden i tok sinia mens tim i no difendim Melanesian Kap long Vanuatu. Bikpela as na watpo PNG i no laki tumas em planti ol yangpela pilaia i stap long tim na ol i no winim bek Kap.

Tasol long neks yia Anda 19 tim bai go pilai long Fiji long mun Me. Dispela

Wol Kap kwalifaia bai kamap long biksiti bilong Suva.

PNGFA tu nau i tinting long kirapim soka resis bilong junia meri. Ol meri krismas bilong ol aninit long 13 na 16 i mas redi. Dispela kompetisen bilong meri i bihainim wanpela lo we FIFA, o mama bodi bilong soka i laik olgeta kantri i mas gat junia soka tim.

Mommers i tok olsem yut soka em i gat mining. Em i strong bilong soka long bihainim taim olsem na PNGFA i mas givim planti sapot long dispela kompetisen.

Namba wan junia Wol Kap bilong ol meri bai kamap long Los Angeles long Amerika. Dispela Kap resis bai kamap semtaim wantaim Wimens Kongres long pasim na paitim toktok bilong strongim wimens soka long wol.

Na tu long neks yia Anda 23 tim bai stap insait long Olimpik kwalifaia soka tonamen. Dispela kik resis bai kamap long Nu Silan long mun Disemba.

Mommers i tok 1999 em i bikpela yia tru olsem na olgeta soka pilaia, opisel na edministreta i mas redi.

• Sapos soka i aut long Saut Pasifik Gems long Guam, PNGFA i stretim pinis arapela kik resis bilong ol. Ol meri bai go kik long Sydney Sports Festival. Dispela em wankain tonamen i bin kamap long dispela yia we PNG i pinis namba tu long en.

HEPI 21st B/DEI TO

Mary Joyce Kuroi

OF
SALAMANDA STREET
LAE
WHO WILL TURN
21 TODAY



Love & Best wishes from Kuroi's of Salamanda street Lae, and all the gangs of Salamanda street.

Also best wishes from friends, relatives & families in Lae, Madang & Sissi. Wish you all the best & may God bless you in your coming years. B.O.L.A.



Lukluk bek

long

1998



BAIM kaikai long ol lokol maket em isi wok bilong olgeta Papua Niugini lain long mekim.

Planti pipel i save long wanem samting ol i laikim na ol i yusim mani bilong ol long baim samting ol i laikim stret. Baim ol bikpela na kain kain samting long ol bikpela stua i hatpela samting long mekim. Em i hat long luksave sapos prais bilong samting long stua i stret long laikim bilong yu.

Sapos samting long stua i bikpela samting, em i save hat long yu klia long yu laik baim o nogat. Inap kastoma i helpim em yet?

Maski sapos kastoma i no amamas long dispela samting, bikpela samting em wanem samting em i mekim long helpim em yet.

Sapos kastoma i no lukluk gut na baim samting nating, bai i nogat man i kam long helpim em. I gat sampela samting kastoma i ken mekim long luksave olsem mani bilong em i go long baim samting em i laikim stret.

1. Em i mas klia gut long wanem samting em i laikim pastaim long em i stat baim ol samting long stua.

Sapos em i laik baim redio, em i mas redim amas mani em bai tromoi long baim redio.

Em i laik baim bikpela redio o liklik redio we i save yusim bateri o pawa, em i mas redi long dispela.

2. Em i mas lukluk raun long ol sampela stua pastaim na skelim prais bilong ol pastaim long em i baim samting. Sampela taim namba wan stua kastoma i lukim em bikpela prais tumas.

Dispela wankain samting nogut i stap long narapela stua long liklik prais. Olsem na kastoma i mas lukluk raun long ol stua.

3. Em i mas askim ol kwesten long ol wokman bilong stua pastaim long em i baim ol dispela samting. Kain askim olsem:

- askim long prais
- em i wok olsem wanem? (stua kipa i mas soim)
- yu ken baim ol spea pat tu o nogat?

4. Em i mas lukaut long mekim ol toktok bilong sels. Ol stua kipa i no save mekim tok tru olgeta taim. Bikpela samting em ol i save laik salim ol samting tasol.

Kastoma i mas klia gut long wanem toktok em i

mekim long kisim save long dispela samting em i laik baim na wanem toktok em toktok bilong ol selsman.

Lukaut long kain toktok ol selsman bai tok olsem, baim wanpela na kisim wanpela fri. Bikpela samting ol stua i save mekim em ol i no save givim wanpela samting fri.

Nogut kos bilong samting yu kisim fri em i stap insait long bikpela prais bilong samting yu laik baim. Lukluk gut long ol samting yu laik baim taim ol i putim dispela kain toksave bilong ol long ol samting bilong stua olsem baim na kisim sampela samting fri.

5. Em i mas lukaut gut long hevi na samting i bikpela o liklik. Ol kastoma i save paul taim ol i lukim ol samting wantaim kain kain sais na i gat kain kain prais. Bai em i baim liklik bikos em i gat liklik prais o em i mas baim bikpela?. Ansa long dispela kwesten em bihainim amas mani kastoma i gat

long baim samting. Sapos em i gat liklik mani tasol, orait bikpela samting i no bilong em long baim.

Tasol long baim bikpela samting ya em gutpela bikos bikpela samting yu baim, em i kos liklik long wanwan yunit, kain olsem wanpela kilo.

NLAS amamas long ol sponsa bilong raitim stori resis



• Dairekta bilong NLAS, Willie Jonduo i sanap wantaim sampela ol sponsa, Peter Leahy Ri Tinto, Joe Kanekane Word Publishing na Stacey Levakia BSP.

DAIREKTA bilong Nesenel Litresi na Awenes Sekreteriat, Willie Jonduo i givim pinis 5-pela setifiket i gat luksave i go long ol kampani husat i sapatim 1998 resis bilong raitim stori. Mr Jonduo i tokim ol lain sponsa

olsem helpim bilong ol i surukim wok bilong litresi i go moa yet.

Em i tok, kantri i bungim bikpela hevi long rot bilong mani, na helpim ol kampani i givim i soim olsem ol tu i gat luksave long kirapim pasin bilong rit

na rait i go het. Em i tok, i hat long kisim helpim long dispela kain taim, na helpim i kam long dispela ol lain, i strongim wok bilong NLAS.

Peter Leahy, koperet afeas menesa bilong Rio Tinto kampani i tok olsem, ol lain bilong em i amamas long stap insait long kain helpim. Em i tok, Rio Tinto i gat wanpela program wantaim ol skul, na tingting bilong ol long stap insait long dispela resis i bihainim tasol wok bilong ol.

Maketing menesa bilong Word Publishing, Joe Kanekane i tokim ol sponsa olsem, dispela resis i pulim moa long 3000 ol tumbuna stori, redio pilai, sotpela stori na essay. Em i tok, kain bekim olsem i soim olsem planti pipel long kantri i wok long save long rit na rait. Em i tok tu olsem, rot long karim ol niuspepa, redio o samting bilong rit i go long ol bus ples i wok long go bikpela.

Ol lain husat i stap insait long sapatim dispela resis em: Word Publishing Ltd, K1000 na edvetaising spes, NCDC K3000, Rio Tinto Minerals, K100, Mobil Oil, Fuel Vausa, ol liklik prais, na BSP, K300 wantaim wanpela Kundu kat.

HEPI NIU YIA

Menesmen na Wokman meri long Ela Motors
i laik tok Hepi Niu Yia Tru igo long olgeta
Klaiens na Kastomas bilong ol istap insait
long Papua Niugini.

DRAIV ISI NA HAMAMAS GUT LONG DISPELA NIU YIA



YAMAHA

Hino




YANMAR



Ela Motors
NATIONWIDE



1



2


1 • Ol manmeri long biktaun Beijing long Saina i wok long pilai kas long winim smok. Smok em wampela bikpela hevi ol saintis i tok bai kilim planti manmeri we krismas bilong ol i aninit long 29 taim ol i go lapun. Dispela toktok i kamap bihain long ol saintis i skelim ripot bilong 1 milien manmeri husat i bin dai pinis long Saina, na ol i ting bai 100 milien moa bai dai taim ol i kamap lapun liklik.

2 • Ol Muslim lain husat i bin straik i tromoi ol hevi samting antap long wampela ka ol i kukim pinis long paia taim bikpela straik na pait i bin kamap namel long ol kristen na Muslim lotu long Novemba las mun long Indonesia. Ol Muslin i straik na kilim 7-pela kristen lain pinis na brukim ol mak na sain bilong ol kristen na kukim foapela haus lotu, brukim tripela arapela haus lotu na ol arapela haus lotu em ol i brukim windua na arere bilong ol.

3 • Ahmed Obeid nau i lusim kalabus na i kamap long haus na holim pas mama bilong em. Dispela em bihain long Isrel gavman i wanbel na rausim ol kalabusman bilong Palestin i go fri long dispela mun. Mak olsem 250 kalabusman bilong Palestin i bin go fri long bungim famili bilong ol gen.

4 • Wampela bikman i go putim flawa long piksa bilong Galina Starovoitova long kantri Rasia. Planti manmeri i tingim yet dispela meri Galina bihain long sampela lain i bin kilim em i dai tupela mun i go pinis. Meri ya i gat nem long wok politiks na em i save tok tok long demokrasi insait long dispela komunis kantri bilong Rasia.

5 • Liklik pikinini bilong Kosovar i wetim dokta long kamap na givim marasin long em. Tumbuna meri bilong em tu i sik na slip wetim dokta i stap. Dispela em long hap bilong Sebia long Midel Is. Ol NATO sip bilong Amerika i bin go testim bom long hap na kamapim ol bagarap long ol manmeri olsem.



3



5



4

Krismas i save kam na i go, ...olsem na yumi ol man i mas senis

BUSTIN ANZU i raitim

YIA i kam, yia i go, mun i kam, mun i go, de i kam, de i go. Ating em namba tasol i senis ya. Nogat em, olgeta de na nait i wankain tasol, tasol ol namba tasol i senisim i go i kam na yum tok dispela em 1970 na nau em 1998, kain samting olsem.

Nau yumi kam long pinis bilong dispela yia, 1998. Yumi lukim gutpela na nogut bilong dispela yia na tok narapela yia i kam bai i gutpela na moa long dispela yia.

Tasol mi tok pinis, olgeta yia i wankain tasol. Olgeta i gutpela na olgeta i nogut wantaim. Mipela i no ken rabisim wanpela yia na tok narapela i nogut. Moabeta yumi mas senisim pasin bilong yumi yet.

Dispela em tru mining bilong nupela yia. Yumi mas senisim olgeta. No ken hap hap tasol. Long dispela rot tasol bai yumi ken glasim olsem wanem em mining bilong ol nupela yia.

Promis nating

Planti lain long dispela graun, blak na wait skin long olgeta hap graun i save wokim kain kain risolusen o tok promis olsem ol bai lusim dispela kain pasin na stap isi, o tambu long wokim wanpela pasin na stap isi tasol o ol kain samting olsem. Planti taim dispela kain promis bilong ol i no save karim kaikai.

Mipela i no ken wet long ol narapela manmeri i kam na senism mipela. Mipela i kisim pinis save long mekim ol samting na kamapim senis.

Dispela i min olsem nau mipela i ken sanap long dispela save na mekim samting.

Nau taim mipela i luksave olsem graun bilong mipela i gat ol risoses olsem gol, kopa, kopi, kakao, wel pam na ol arapela moa em mipela i kisim save nau.

Taim ol lida bilong mipela i kisim save long tok pait long politiks na lukautim kantri, em mipela i kisim tingting na save pinis long mekim senis long yumi yet na sindaun bilong yumi wanwan long komyuniti na kantri olgeta.

Bikpela asua nau i stap em long hevi bilong lo na oda. Dispela em wanpela bikpela hevi nau i stap. Namba tu em gavman i no strong tumas. Pasin bilong holim na bagarapim ol meri, kilim narapela man i dai, brukim haus na stilim ol samting, hensapim ol manmeri na kisim mani na kago bilong ol, pulim spak brus na planti arapela moa i kamap bikpela hevi long kantri tude.

Olsem na bai mipela i stopim ol dispela kain pasin olsem wanem. Askim bilong dispela askim i stap long yumi wanwan. Olsem wanem bai lo na oda hevi i pinis.

Planti trabel

Long dispela as na planti ovasis kampani i les long karim mani i kam na wok long kantri bilong mipela. Ol i pret long laip bilong ol, nogut ol raskel i kilim i dai ol na stilim mani bilong ol. Planti bilong ol dispela kampani husat i ronim bisnis insait long kantri tu i lusim pinis na go nabaut long narapela kantri.

Wanpela klia piksa long Lae em Saina Taun. Mi ken tingim, long 1988, mi kam long pilai soka long Bubia Rises setsin na mi go raun wantaim ol poro long dispela hap.

Dispela taim i gat planti stua na ol manmeri na pikinini i ron long laik. Nogat wanpela hevi i kamap. Olgeta taim dispela hap i pulap



• Ol sampela poroman long Lae siti i amamas gut tru. Tasol taim bilong krismas na Nu Yia em taim bilong sampela long senisim sampela pasin bilong ol.

long lain bilong stua tu i amamas long ronim bisnis bilong ol.

Tasol bihain long 1992 i kam inap nau 1998, nogat ol Saina moa long dispela hap. Nogat manmeri i raun long dispela hap moa. Planti bilong ol dispela stua i pas pinis, i nogat 6 kilok yet na ples i nogat manmeri i raun. Ol pisin tasol i krai na flai nabaut i stap.

Em ples bilong ol stilman na ol raskel. Ol i save spak nabaut na hensapim ol ka na pulim ol meri i go na bagarapim ol.

Nau tasol gavman i luksave na wokim pinis wanpela plis stesin namel long senta bilong Saina Taun. I no op yet., tasol bai i op klostu taim.

Olsem na sampela senis i wok long kamap long dispela hap olsem ol i penim ol olupela stua na operet isi isi. Olsem wanem, dispela em wanpela bilong ol dispela senis?

As tru bilong trabel

Narapela as bilong ol dispela lo na oda hevi em mipela i mas pinim han i go long memba bilong

mipela long palamen. Ol i as bilong dispela hevi tu.

Ol i giamanim planti manmeri bilong ol na tok, bai mipela i mekim olsem olsem na bihain i go sindaun olsem ai na iau pas man long palamen na harim tok gris bilong ol narapela lidaman long paitim han tasol long toktok bilong ol.

Ol i kam bek long ples na giamanim ol lain na tok mipela tok olsem, olsem long palamen na kam. Samting tru ol i go stap bek bensa na sapota tasol bilong arapela lida.

Dispela as tasol planti tausent, milien mani i lus long ol wok i nogat kaikai bilong em.

Gavman nogat rot bilong kisim bek dispela mani na putim olgeta hevi i go insait long baset, apim takis, katim skul subsidi, laik salim ol bisnis na graun na planti arapela pipia pasin long strongim kona bilong ol.

Olsem na ol yangpela long rot i painim hat long painim wok na kamapim ol bikhet pasin long ol taun na siti.

Olsem na gavman i mas senisim pasin bilong em na skelim gut wanem rot em i mas bihainim long sevim tru ol pipel bilong dispela kantri, PNG.

Olsem na mi tok gen, yia em namba tasol. Noken ting nupela yia bai kisim gutpela samting i kam long yumi wanwan.

Yumi yet i mas sindaun na skelim gut wanem rot na pasin mipela i bin mekim long stat bilong dispela yia i kam.

Noken ting olsem ol yia bai senisim mipela. Em mipela yet i mas senis na wok insait long ol dispela yia.

1998 em kam na nau bai pinis. Yu gat bel hevi na kros na wari, lusim bilong 1998 long skelim.

Taim klok i givim stret long 12 kilok long Januari 1, 1999, yu mas opim bel bilong yu wantaim nupela pasin na nupela bel.



• Hia em ol sampela yangpela mangi insait long long Tabubil na Ok Tedi eria i bin senisim pasin bilong ol na i laik sindaun gut long lotu pasin.

Raun wara i kamap na sevim planti pipel



BIPO bipo tru i gat tupela lain klen i stap. Tupela lain ya em Pawa Kobeya na lain bilong Pombo Wareya. Tupela lain ya i save stap na wokim bikpela gaden tru.

Tasol long dispela taim, i nogat gutpela wara bilong dring o ol kaikai bilong gaden i ken kisim long groa.

Tupela klen ya i save stap gut na amamas tu. Olgeta taim ol i save amamas long wok bung wantaim long gaden na serim ol kaikai na samting.

Wanpela taim ol i pasim tok long wokim wanpela bikpela gaden. Long dispela gaden bai ol i planim ol kumu tasol.

Olsem na long narapela de, olgeta lain bilong tupela klen ya i sanap lain na stat long katim bus na ol diwai i go. Ol i wokim bikpela gaden tru na planim ol kumu long het bilong gaden i go daun long lek bilong en.

Ol i planim ol kumu pinis na ol i stat long brukim gaden ya i go long tupela hap. Wanpela sait em bilong Pawaw Kobeya klen na narapela sait em bilong Pombo Wareya klen. Ol i mekim olsem pinis na olgeta taim ol i save i go i kam long klinim na lukautim dispela bikpela gaden kumu.



Wanpela taim, olgeta manmeri bilong tupela klen yai go long klinim dispela gaden.

San i hot nogut tru na ol i mekimsave long klinim gaden i go i go na i no longtaim, ol i harim wanpela man i toktok. Ol i stop wok na putim ia long harim wanem samting tru i kamap. Ol i go klostu na harim wanpela nek i tok, "hap gaden i bilong yu na hap gaden i bilong mi". Ol i harim dispela nek tasol. Na man tru em nogat man i lukim.

Olgeta i pret nogut tru long dispela na ol i hariap long bungim ol samting na tekov i go bek long ples bilong ol na ol i stat long stori na kamautim olgeta kain kain stori na bilip nabaut long ol pasin bilong kastam na tumbuna na ol kain spirit bilong bus nabaut.

Long moning, ol i salim wanpela strongpela man tasol i go bek bilong lukim sapos wanpela samting i kamap long dispela gaden.

Ol i salim sampela man i go na ol i hait na lukluk i go longwe long traim lukim sapos sampela samting i kamap. Ol i lukluk gut tru i go na kamap long dispela boda o namel bilong mak we i brukim gaden bilong tupela klen, ol i lukim wanpela raun wara i kamap. Ol i go klostu na lukim olsem bikpela raun wara i wok long kamap na i kamap bikpela nau. Ol i kwiktaim i go bek long ples na stori long olgeta manmeri long dispela samting ol i lukim. Taim olgeta manmeri i go bek lukim, ol i traim long tasim, tasol nogat wanpela samting i kamap long ol. Ol i go insait na pilim gutpela

kol tru na ol i traim long testim na i swit gut tru na i kolim gut bodi bilong ol tru.

Dispela nupela samting i mekim ol i amamas nogut tru na ol i pasim tok gen long lukautim gut dispela samting. Na ol i mas serim gen wantaim olgeta lain yet bilong tupela klen wantaim.

Nau dispela raun wara i kamap na i stap na olgeta manmeri bilong tupela klen ya i save yusim wantaim.

Dispela wara i stap nau yet na i kamap bikpela bikos long stori bilong en. Ol i save kolim dispela wara nau em Bune long hap bilong Lepiti long lalibu Sauten Hailans provins.

**Bembo Maka
Is Taraka
Lae, Morobe provins.**



NEM: Tina Sorayah
KRISMAS: 21 (meri)
ADRES: PO Box CT 600, Oguua District, Ghana, West Africa.

LAIKIM: Harim musik, ritim buk, pilai volibal, danis, laikim long prenim ol man na maritim.

NEM: Loveena Esi Baissie
KRISMAS: 23 (meri)
ADRES: PO Box CT 596, Oguua District, Ghana, West Africa.

LAIKIM: Pilai netbal, mekim pren, ritim buk, harim musik, danis, raun lukim narapela ples na painim man bilong maritim.

NEM: Mazi Wapi
KRISMAS: 18 (meri)
ADRES: C/ John Wapi, St Joseph Community School, PO Box 84, Ambunti, ESP.
LAIKIM: Raitim pas, kukim kaikai, wokim bilum, go lotu, pilai basketbal, volibal, ritim baibel, mekim penpren na raitim pas.

NEM: John Wak (23), John Owil (20), Joseph Kerowa (24) na Wape Faiyabe (22)
ADRES: Kutubu Security Service, PO Box 48, Moro, Lae Kutubu, SHP.

LAIKIM: Harim lokol musik, pilai basketbal, ragbi tas, raun lukim ol wantok na narapela ples, bungim ol stem, tok pilai na ritim niuspepa.

NEM: Mathias Wopo
KRISMAS: 16 (man)
ADRES: Menyama High School, PO Box 86, Menyama, Morobe province.

LAIKIM: Raitim pas long ol pren, go lotu, singim lotu song, mekim pren, pilai soka na basketbal na ritim ol buk na niuspepa.

NEM: Charles Sengi
KRISMAS: 16 (man)
ADRES: St Joseph Community School, PO Box 84, Ambunti, ESP.
LAIKIM: Harim musik, go long lotu, pilai soka na raitim pas long ol penpren.

NEM: David Darak
KRISMAS: 19 (man)
ADRES: Ama Investment, PO Box 743, Wewak, ESP.

LAIKIM: Mi wanpela singel manki bilong ples Kuariagua long Midel Sepik. Mi laikim raun wantaim ol pren na otk pilai na wokim pren na marit.

NEM: Elly Iliman
KRISMAS: 20 (man)
ADRES: IOG P/L Moro, PO Box 1, Lake Kutubu, SHP.

LAIKIM: Go waswas long raunwara, painim pis, kisim saksak na kukim arere long raunwara na harim ol kauntri musik, pop musik na lokol musik.

NEM: Makel James
KRISMAS: 14 (man)
ADRES: Sakul Primary School, PO Box 2070, NCR, Madang province.

LAIKIM: Pilai soka, waswas long solwara, go long danis, lukim vidio, go lotu na harim ol PNG top 20 musik.

NEM: William Walep
KRISMAS: 20 (man)
ADRES: Golden Trading, PO Box 9 Banz, WHP.
LAIKIM: Pilai volibal, harim lokol musik, ritim niuspepa, raitim pas long ol meri bilong narapela provins na senisim poto na ol presen, raun lukim ol arapela provins na mekim pren. Mi bai amamas long bekim olgeta pas bilong yupela.



Dia LAIPLAIN,

Laip bilong mi i wok long bagarap tru long wanpela maritman husat i no inap lusim mi stap bilong mi yet. Mitupela i kamap pren 10-pela mun i go pinis, tasol taim mi painimaut olsem em i g.: meri na ol pikinini, mi tokim em olsem mi laik stapim dispela prensip bilong mitupela.

Tasol em i no harim dispela toktok bilong mi na olgeta de em i save kolim mi long telefon long toktok wantaim mi. Bai mi mekim wanem long stapim ol dispela telefon bilong em na tu noken larim em i kam lukim mi moa?.

HARASSED

Maritman i strong yet long singel meri

Dia PREN,

Em i sori samting tru taim ol arapela i nogat rispek long toktok bilong mipela na ol i ting ol i ken go pas na lukautim laip bilong mipela. Man yu raitim dispela toktok long em i soim klia olsem em i nogat trupela laik long yu. Tasol em i gat laik bilong em yet long wanem samting em i laik mekim long yu.

Mipela i klia olsem yu mekim gutpela pasin long traim stapim dispela pasin poroman bilong yutupela, i no long gutpela sait bilong yu yet, tasol long gutpela sait bilong meri na ol pikinini bilong em. Em i gat bikpela wok long lukautim ol na em i noken traim long raun wantaim narapela meri.

Sapos yu go het yet na prenim dispela man, bai yu bungim ol pasin olsem sem na wari long bihain taim.

Ol lain olsem dispela man i no traim long stretim gut marit laip bilong ol na i wok long laik painim meri raun, em ol lain we i gat bikpela hevi tru long laip bilong ol. Ol i mas kisim bikpela na strongpela helpim tru long save gut long wanem em trupela pasin bilong laikim narapela (marit). Sapos ol i abrus long kisim dispela kain helpim, ol bai inap long bagarapim laip bilong planti gutpela lain.


Em i klia olsem yu laik stapim dispela poroman pasin namel long yu na dispela man. Yu mas strong yet long daunim em long soim olsem yu

laik lusim dispela prensip bilong yutupela. Bai yu mekim dispela samting gut olsem wanem?.

Sapos em i ring o kamap long wok ples bilong yu, inap yu tokim bos bilong yu long dispela hevi na kisim sapot bilong bos?. Sapos man ya i kam lukim yu long haus, inap ol papamama bilong yu o famili bilong yu i tokim em long klia i go?.

Sapos em i go het yet na mekim olsem long yu, yu mas tokim wanpela plis opisa long givim em wanpela oda pepa long tambuim em long i noken kam klostu long yu. Sapos em i go het na abrusim ol dispela rot yu kamapim, tokim plis long kisim em.

LAIPLAIN



• Antap: Billy Eki bilong Morata Swans i bungim bikpela trabel stret ya.

• Lephon: Tupela pilaia bilong Morata Swans i apim pilaia bilong Hohola long Gavanoas Kap ragbi ling salens.




• Aninit long lephan: Rusdos Ako i painim taim long han bilong wanpela pilaia bilong Morata Swans.

• Aninit: John Wari bilong Morata United i panim rot long difens bilong Morata swans. Tupela tim i bung long Gavanoas Kap lig salens long Pot Mosbi.



• Oi pilaia bilong Morata United i bungim fowat bilong Morata Swans Peter Naipao

WANTOK SPOT



PNGRFL tokaut long Kumul tim

PAPUA Niugini Ragbi Futbal Lig i tokaut pinis long tim bilong en long pilai insait long Wol Nains tonamen long Saut Afrika long Februari. Dispela ragbi lig tonamen bai kamap long Ellis Pak long Johannesburg.

Siaman bilong PNGRFL Rod Pearce i tokaut long nem bilong ol pilaia em Adrian Lam, David Buko, Marcus Bai, Stanley Gene, David Gomia, Raymond Karl, James Kops, Julius Krewanty, Bruce Mamando, Andrew Norman, Tom O'Reilly, Alfred Songaro, Leonard Tarum na David Westley.

Pearce i tokaut olsem Lam bai go pas long tim olsem kepten na Bob Bennet bai kosim tim.

Tarum i holim yet posisen bilong em olsem huka. Boi Rabaul i save pilai long Paga Panthers na em i soim tru taim i stap long Kumul tim long 50 yia anivesari tim. Maski sais bilong em i liklik, em i save pilai strong long daunim ol bikpela fowat bilong oposisen.

Tarum i winim posisen bilong em bihain long em i kisim strongpela salens i kam long Tom O'Reilly bilong Gold Coast Chargers long Australia.

Dispela em i namba wan taim tu Max Tiri, wanpela olpela pilaia bilong Kumul i no stap long tim. Tiri i save stap long olgeta Kumul tim i kam inap nau we ol i larim Bruce Mamando long kisim ples bilong em.

Elias Paiyo husat tu i gat tingting long pilai long Kumul i no winim wanpela ples.

Long dispela wik yet Paiyo i bin tokaut long niusman olsem em i gat laik long pilai na makim gen kantri bilong em. Em i wok tren hat aninit long lukaut bilong Richard Beasley bilong Saut Sydney ragbi lig klap long Australia.

Pearce i tokaut olsem bai i no gat kem. Tasol olgeta pilaia bilong PNG bai go bung wantaim ol pilaia long Sydney na bai go stap kem long Saut Afrika. Nesenel Ragbi Lig i baim olgeta rot na wokabaut bilong tim ya.

Siaman i tok ol-selektia i kamap wantaim strongpela tim na em i gat bilip olsem tim ya bai mekim Papua Niugini i amamas.

PNG i stap long grup bilong Ingran, Nu Silan, Fiji na Cook Ailan. Na long arapela pul em Australia, Saut Afrika, Tonga, na France.



• Tripela ovasis pilaia bilong PNG (l-r) Stanley Gene - Hall Kingstone Rover (Ingran), Marcus Bai - Melbourne Storms na Adrian Lam - Sydney City Roosters i tok pilai bihain long gem.

HENRY MORABANG i raitim

TOKTOK bilong soka bai i no inap kamap long Saut Pasifik Gems long Guam bai kamap tru bikos soka fil i no redi.

Numa Alu, tim menesa bilong PNG husat i bin raun long Guam las wik i tokaut olsem soka fil bai i no inap redi long taim bilong Saut Pasifik Gems i op. Na em i min olsem bai i no gat soka.

Arapela samting tu em FIFA i strong yet long Saut Pasifik Gems Kaunsil i mas bihain lo bilong en long ranim ol soka gem.

Presiden bilong SPG Kaunsil John Dawanincura i tokim Fiji Times olsem soka fil i no redi na tu Kaunsil bai i no inap mekim senis

long dispela inap long Me 29. Dispela taim em gem bai stat long Guam.

Dawanincura i tok graun i no redi em i min olsem Gems Kaunsil i mas painim arapela rot bilong holim soka.

Na long bihainim toktok bilong FIFA, Dawanincura i tok em bai hat long mekim dispela senis long lo long bihainim toktok bilong FIFA.

Rul i tokaut klia olsem sapos wanpela man i stap long kantri inap 4-pela yia em i ken makim PNG tasol aninit long FIFA rul, ol asples man yet i mas makim kantri.

Soka fil i no redi long Guam

Sapos FIFA i laik stretim dispela lo, ating dispela bai mekim bikpela senis tu long ol arapela 24 spot husat bai pilai.

Em i tok ol memba kantri bilong OFC na FIFA i no bin mekim dispela toktok bihain long 1995 South Pacific Gems long Tahiti.

"I nogat wanpela kantri insait long Pasifik, OFC na FIFA i bin kamapim dispela toktok long senis long lo," Dawanincura i tok.

Em i tok em bai hat tru holim miting bikos pe bilong balus i dia. Sapos soka i laikim senis orait OFC o FIFA yet i ken bai rot.


Sekretari bilong Fiji Futbal Asosiesen Bob Kumar i tok olsem

OFC i bin salim sampela toktok long Gems Kaunsil long soka i mas bihainim lo bilong FIFA.

Dispela ol toktok bilong senis bai i no inap kamap. Sapos wanem senis i kamap em bai kamap long yia 2001 long mini Gems na 2003 long Saut Pasifik Gems long Fiji.

Dawanincura i tok em bai salim wanpela pas i go long ol memba kantri long dispela toktok sapos ol i laik bihainim toktok bilong FIFA yet o ol bai bihainim Gems sata.

Siaman bai raun long Guam long lukim ol fil bilong pilai bihain long Niu Yia na raitim wanpela ripot.



• John Dawanincura.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.